

宋

會

要

全唐文

宋會要

分司 太祖建隆元年二月以左驍衛大將軍致仕李彥崇為右羽林大將軍分司西京 三年二月以左清道率府率范昭祚為左衛將軍分司西京 開寶二年八月以太子少詹事王祐為少傅少監分司西京 四年六月翰林學士左散騎常侍歐陽迥落職以本官分司西京 七年十二月以江南偽命官許憲為右贊善大夫分司西京 九年八月以江南偽命官崔萬安為太府少卿分司西京 太宗太平興國六年十月除名人
和峴為秘書丞分司西京 七年正月以除名人張炳

為殿中侍御史分司西京 八年七月以前崇信軍節
度掌書記沈承慶為大理寺丞分司西京 雍熙元年
十二月追官人段從革為秘書丞分司西京 二年正
月除名人曹翰為右千牛衛大將軍分司西京 四年
十二月前右補闕蘇德祥為殿中丞分司西京 真宗
咸平元年九月以左衛上將軍張永德為太子太師分
司西京仍授其孫大理寺丞文蔚西京監當以便就養
明年十二月以車駕北征召永德為東京城內外都巡
檢使三年二月復授彰德軍節度使 三年六月西京
左藏庫使張正吉為左衛率府副率分司西京 四年
七月都官郎中分司西京楊坦檢校秘書少監充安遠

軍節度副使坦年老上言分務不便故改授焉 五年
九月右僕射張齊賢為太常卿分司西京坐子宗誨與
薛氏訟財故也十一月以職方員外郎分司西京樂史
直史館史年七十餘以郊祀畢奉留守司表入賀真宗
召見以其筋力不衰篤學好著書故授以舊職 六年
三月以前太子中舍呂藩守本官分司西京藩故相端
之子病足請告凡數年當落籍特推是恩也 景德元
年七月以光祿卿李昌齡分司西京昌齡知光州轉運
司言其病不任事故有是命閏九月以歸德軍節度副
使胡旦為祠部員外郎分司西京 四年九月以四方
館使平州防禦使知同州上官正為左龍武軍大將軍

領平州防禦使分司西京起居舍人知華州張舒守本
官分司西京並以轉運使言老疾不任吏事而正以嘗
預平蜀功故特令領郡優其俸給 大中祥符二年三
月吏部尚書致仕宋白言母氏年八十五歲臣弟爰見
任職方員外郎分司西京欲望除一致仕官帶分司俸
給以遂侍養詔令依舊分司支給請受許赴東京侍養
三年七月詔左龍武軍大將軍韶州防禦使分司西
京韓宗訓請依見任例支給 四年二月詔應西京
分司文武官不因賊罪授者科錢三分中特給一分見
錢 六年六月以翰林學士戶部郎中知制誥楊億為
太常少卿分司西京陽翟養疾俟校日赴西京億以母

疾上章請告不待報而行既至許州復自稱病故有是命七年十一月右諫議大夫權西京留司御史臺陳象輿為衛尉卿分司西京先是河南府言象輿不職故有是命天禧四年正月以太府卿裴莊為光祿卿將作監韓援為秘書監兵部郎中崔昺為太常少卿並依前分司十一月以保靜軍節度副使戚綸為太常少卿分司南京綸以疾陳請故也十二月比部員外郎孫夢協乞分司南京取便居住詔許焉後多援例許從便居住五年正月司勳員外郎知解州蕭芳分司西京仍以其子殿直國真監西京牧馬監以便侍養十一月山南東道節度使同平章事王欽若責授銀青光祿大夫

司農卿分司南京欽若時判河南府稱疾擅離任赴闕
故有是命 乾興元年四月

仁宗即位未改元

以秘書監分司

西京韓援為太子賓客太常少卿分司西京崔昺為太
僕卿兵部郎中分司西京馬紳司封郎中分司西京韓
昌齡並為太常少卿皆依前分司六月守司徒兼侍中
丁謂降授太子少保分司西京謂為真宗山陵使坐與
內侍雷允恭擅移皇堂當降制止命舍人院草詞九月
詔銀臺司閤門都進奏院自今分司官表章並許收接
時分司西京韓援上言准都進奏院公文分司致仕官
并前任丁憂持服官表章無例投進緣分司官見今食
祿列在班簿致仕官亦有俸給即與丁憂持服不同故

有是詔

仁宗天聖元年五月給事中充集賢院學士

張復為光祿卿分司南京與假百日將理候痊損發赴
南京七月主客員外郎判三司度支勾院李宗諒言姪
國子博士昭迪昨自汾州通判就差監潁州正陽鎮鹽
酒稅兼兵馬都監為患乞就除分司西京且在私家求
醫損日却赴西京詔給假百日將治候痊損發赴西京
二年四月以知曹州刑部尚書集賢院學士薛映本
官分司南京仍於曹州居住九月知兗州工部侍郎李
應機為將作監分司南京徐州居住三年四月知宿
州工部郎中孫元方求分司詔以元方在任公事無曠
闕今終此一任差替六年十二月主客員外郎分司

南京邵煥落分司就蓋監當 七年十月工部郎中監
泰州茶鹽商稅務周嘉正分司西京泰州居住嘉正言
兼男茂先近授楚州司戶叅軍乞改授泰州倚郭縣簿
尉或判司從之 慶厯五年十二月賜司封員外郎分
司西京趙希言三品服仍賜錢十萬初樞密使王貽永
副使龐籍丁度言希言嘗講禁中年餘八十而家素貧
故賜之 六年七月右正言知制誥知吉州余靖為將
作少監分司南京許居於韶州 皇祐四年正月詔御
史臺臣僚年七十因體量罷官或分司致仕者更不推
恩子孫 嘉祐四年九月以翰林侍讀學士禮部郎中
知和州呂泰落職降官分司南京 五年六月以寧國

軍節度副使孫沔為光祿分司南京至七年十月以知
濠州 神宗熙寧三年六月光祿卿知舒州楊嶼守本
官分司南京嶼以本路轉運司奏庸懦不職乞改宮觀
差遣故也 元豐元年七月十九日詔自今武臣遙郡
已上分司如歷任不因戰功轉官及不曾任管軍及橫
行並除南班官分司 三年九月四日御史王祖道言
太常丞汪輔之除廣東轉運副使輔之即乞分司致仕
朝廷為改成命令依舊為開封府推官臣竊以平日無
事差一監司諛避免而不行萬一二廣有邊陲之警朝
廷何以使人誰肯為陛下行者望從輔之之請詔許輔
之分司 四年十二月十六日詔見分司官三年罷自

今更不許分司以侍御史知雜事滿中行言乞自今見
任官吏不許陳請分司已分司者候滿二年放罷 括
宗元祐元年五月十八日詔李定落龍圖閣直學士守
本官分司南京揚州居住定父沒始解官持所生母心
喪劉摯言其不持服也同日詔三京依舊置分司官六
月十二日詔相州觀察使張誠一特責授左武衛將軍
分司南京於本處居住以左正言朱光庭言邪險有虧
孝行也 十八日詔資政殿大學士正議大夫提舉西
京嵩山崇福宮呂忠卿落職降為中散大夫光祿卿分
司南京蘇州居住以諫官蘇轍中丞劉摯論列故有是
命二十七日詔龍圖閣直學士李定責授朝請大夫少

府少監分司南京滁州居住以左司諫王巖叟言不特
所生母仇氏服故有是詔十月三日詔奉議郎前太府
寺丞王璋許守本官依舊太府寺丞分司南京璋以疾
自陳故也自是應自請分司並帶職事官 紹聖元年
七月十八日詔降授左正議大夫知隨州呂大防守本
官行秘書監降授左朝議大夫知黃州劉摯守本官試
光祿卿降授左朝議大夫知袁州蘇轍守本官試少府
少監並分司南京大防鄧州摯新州轍筠州居住以御
史中丞黃履等言大防等謗訛先朝變亂法度乞各正
典刑故有是命 二年五月二十二日詔依元豐四年
朝旨見任官不許陳乞分司從殿中侍御史郭知章言

也 三年八月十九日詔梁濤除少府監降授奉議郎
管勾洪州王隆觀南安軍居住劉安世除少府少監並
分司南京各於本處居住 元符元年正月二十四日
前知應天府趙君錫等將公使庫寄納官錢借使詔君
錫以少府少監分司南京亳州居住 三年歲次甲午
六月十日左正言陳瓘言龍圖閣待制知荆南府邢恕
昨者自謂親聞司馬光有凶悖之語遂以告於章惇而
光及范祖禹等緣此貶竄又以文及甫私書達於蔡確
妻明氏謂劉摯梁燾王巖叟皆有姦謀而摯等家族幾
至覆滅按恕嘗以反覆詭詐得罪先朝公議不容固亦
久矣今寵以華職付之大藩中外沸騰不以為允望降

睿旨原情定罪以協公議三省進呈璿疏韓忠彥請改
撰司馬光呂公著告命上曰但取邢恕訓詞中具載此
意則天下皆知之矣是日責恕為少府少監分司西京
筠州居住 欽宗靖康元年二月十八日詔太師蔡京
特責授中奉大夫秘書監分司南京致仕河南府居住
以言者論京政和中首建平燕之議王黼當國循襲創
造邊患黼大正典刑如京之惡豈可獨貸故有是命
高宗建炎元年五月二十九日資政殿大學西道總管
王襄責授中大夫秘書少監分司北京襄陽府居住資
政殿學士北道總管趙野責授中大夫秘書少監分司
南京青州居住以提兵在外不能入赴國難而為退避

之計故也七月三日詔朝奉大夫充徽猷閣待制知平
江府鄭滋落職責授秘書少監分司南京筠州居住以
為郡耽樂不恤國艱故也三年三月十二日詔光祿
大夫提舉南京鴻慶宮黃潛善責授秘書少監分司南
京衡州居住正議大夫提舉西京嵩山崇福宮汪伯彥
責授秘書少監分司南京永州居住皆以其謀國不臧
致虜騎憑陵故也十七日詔錢伯言責授軍器少監分
司西京澧州居住以伯言常棄城而遁故也同日詔黃
潛厚責授中大夫秘書少監分司南京道州居住以殿
中侍御史王庭秀論其賣官售寵故也七月八日詔張
敬落職責授秘書少監分司南京衡州居住以朋附苗

傳劉正彥故也

四年五月二十三日詔中大人同知

樞密院事周望授青祕書少監分司南京衛州居住初

望為江浙制置使以嘗有補獲苗瑀功遂超拜本兵之

任既而以宣撫使總師平江會金人南牧望不能統御

大軍為捍禦計望風先遁致虜騎乘間復破吳門連陷

諸郡言者乞加誅斥乃有是命八月十八日詔權知三

省樞密院事滕康同權知三省樞密院事劉珏並責授

祕書少監分司南京滕康永州居住劉珏衛州居住以

言者論其傳聞警報使太后乘流陟險故也九月十七

日詔分司居住人該遇今年二月二十三日德音令所

屬具元犯因依取旨移放 紹興元年十月三日詔朱

勝非責授中大夫分司南京江州居住坐辭難避事之
罪也 十年閏六月二十五日詔前相趙鼎責授中大夫
祕書少監分司南京興化軍居住 十一年十一月
十三日詔范同責授左承事郎祕書少監分司西京筠
州居住朱翌責授左承事郎將作少監分司西京韶州
居住臣僚言同當貳政之始首為遷葬之謀驅役疲民
騷動州縣州縣之吏望風而迎祭者絡繹於道以朝廷
執政之尊而恃威怙權蔑視百僚無所不至至於掩人
主之雋功稱為已有勸人主之必殺恣為已私陰結維
城之賊密通左右之臣引用非人植立黨與必欲盡排
異己者而中傷忠良故如朱翌邵大受之徒皆以儼輕

險躁之資甘為鷹犬廝役之態同之所向翌等必附之
翌等所言同必行之吏唱迭和共濟其姦故有是命
十二年正月二十九日詔孫近責授左朝散郎祕書少
監分司南京漳州居住以臣僚列其交結朋比之罪故
也十月二十一日詔左朝奉大夫提舉江州太平觀何
鑄責授左朝奉郎祕書少監分司南京徽州居住以破
和議故也三十一年七月十九日詔同知樞密院事
周麟之責授左朝奉大夫祕書少監分司南京筠州居
住以其辭避使虜故也

宗會要 判知州及軍監

周朝州鎮有關或遣朝官權知太祖始削外權牧伯之
闕止令文官權知其後文武官參為知州軍事二品
以上及帶中書樞密院宣徽事者稱判兩朝國史志知
州通判判官掌書記推官支使錄事參軍司戶參軍司
法參軍司理參軍知州府事各一員府以朝官及刺史
以上充州以京朝官閤門祇候以上充凡州之別有六
曰都督曰節度曰觀察曰防禦曰團練曰軍事凡諸國
赴本任或知他州皆不簽書錢穀事通判州各一人與
長均理州府之政無不統治藩府或置兩員廣南小州
有試秩充通判兼知州者節度觀察皆有判官京官以

上充則謂之簽書判官事又節度有簽書記觀察有支
使而節度觀察防禦團練軍事皆有推官府則置司錄
州則置錄軍參軍而下各一人戶多事繁則置司理二
人自通判而下州小事簡或不備置又節度防禦團練
皆有副使而節度團練副使並以待左降官諸州有司
馬長史文學參軍助教士人或特恩而授不釐務亦
有以負犯人為之者流外則止除別駕司馬又有軍監
使掌同諸州以京朝官及閤門祇候以上充亦有稱知
軍監事者邊要之地或戶口繁多亦置通判以京朝官
充判官各一人以京朝官及選人充司戶司法司理參
軍並同諸州軍小事簡不備置非繁劇而不領縣務者

量減官屬河南應天大名使牙職左右軍巡院悉同開
封而主押以下差減其數府院置孔目勾押司開折官
行首雜事前行其餘州府使院置都孔目官都勾押官
各一人又節度觀察有孔目勾押勾覆押司官前後行
之名衙前置都知兵馬使左右都押衙都教練使押左
右教練使散教練使押衙軍將又有中軍子城鼓角宴
設作院山河等使或不備置又客司置知客副知客軍
將又通引司置行首副行首通引官其防禦團練等州
使院衙職悉約節置而差置焉元豐以來具職官志
太祖乾德四年十月詔應荆湖西蜀僞命官見為知州
者令逐處通判或判官錄事叅軍凡本州公事並同簽

議方^得施行時以偽官初錄用慮未悉事故有是命焉

開寶五年初平嶺南以其地有瘴毒艱於命吏詔以

太子中允周仁俊領瓊管五州仁俊言請以偽命官駱

崇璪等分知諸州事乃以崇璪知崖州譚崇知儋州楊

舜卿知振州朱光毅知萬安州仍各授檢校官八年

八月以陳州南頓縣令楊可法為鄭州防禦判官權知

軍州事太宗太平^興國九年三月選祕閣丞楊延慶等

十餘人分知諸^州太宗謂宰臣曰刺史之任最為親民

非其人則其民受其弊昔後漢秦彭為潁川郡守教化

大行百姓懷惠乃有鳳凰麟麒麟嘉禾甘露之瑞可謂善

政也以一太守猶能致此況君天下者乎何謂太平之

不可致和氣之不可名也

雍熙三年四月以駕部員

外郎梁商知應州監察御史張利涉知朔州右贊善大

夫馬務成同知棗州左拾遺張舒同知雲州特田重進

北^代城凡下州郡即命朝臣領之 端拱元年正月詔州

郡長吏應受制敕暨三司轉運使移文至於部民訴牒

悉繫日著於大簿^以幕吏一人句稽俾絕留事 十一

月以鎮州馬步軍副都總管同知州事光州刺史王明

為禮部侍郎依舊^同知州事仍給刺史俸 真宗咸平

元年二月廣南東路轉運使康戩言新恩循梅四州瘴

有毒請於江南州縣官中就選知州詔流內銓選荆湖

福建人注本州官令知州事 二年六月二十六日詔

廣南宜邕欽廉融等州知州能綏撫蠻夷俾其樂業者
替日當議優獎別致生事重寘之法 四年二月詔廣
南諸州先令幕職州縣官權知自今並差京官 五年
十月洛苑使李繼和請擇防禦團練莊鎮戎軍真宗曰
屢有人言緣邊州軍宜如往制正除牧守朕謂但得其
人可也前代兵權民政悉付方伯利害亦可見矣 景
德二年十二月十八日詔河北河東陝西路緣邊州軍
官為通判幕職巡檢既為所舉則在職依違不能協正公
務後今為宜罷舉 三年六月詔近日知州已下多與部
內使臣官屬為姻後方以聞致煩移替自今應轉運使
副使知州已下不得與部內使臣官員為姻違者並行

朝典 九月廣南轉運使言邕州都押衙知田州黃衆
盈請授檢校官知州事詔授銀青光祿大夫檢校太子
賓客兼監察御史武騎尉知州事 四年四月詔選嶺
南人應職有聞者優與改官令知廉州先是廉州知州
數年間亡復者四人帝諭以非習水土者不可令往時
邠暉自廣南安撫回因令保舉使臣一人優命遣之至
是復降此詔 十一月詔審官院今後選京官魯知縣
者充廣南知州通判依例引對 大祥中符四年八月
一日以捧日右廂都指揮使王潛等七人為諸州團練
刺史並赴本任仍詔審官院擇官為通判 五年六月
故恭孝太子韓國夫人田氏言兄閣門祇候承說乞入

知州軍差遣帝曰親民官豈可輕授承說先無能幹之
聲止可近便都監 七月詔諸道州府公文並申轉運
使副內丞郎大兩省官知州府本路轉運使副或是本
曹郎中員外及小兩省官雖統攝委於事權然等差紊
於品秩自今應知制誥并觀察使已上知州府凡事申
轉運司公狀並止書案檢令通判并以下職官於狀後
列銜如大兩省官已上充轉運使官高於知州官者即
如舊儀云 六年正月以澧州注洎都監史方知邵州
先是邵州闕知州轉運使遣潭州監稅聞人若拙權
領州事帝以若拙頃與李玟等同謀叛因告變受官付
以親民何以勸俗故以方代之 九月河北安撫司言

冀州路當衝要信使往來先差文臣知州今乞選刺史
已上詔以澤州團練使魏榮知州事 七年四月詔諸
路知州通判每委閱視在城倉庫其外縣者止校簿籍
不須巡行 初淳化中長吏每率行縣之制至是罷之
是月詔慶成軍知事判官不兼知縣主簿 自汾陰
禮成以榮阿縣為軍仍隸河中府官屬猶領縣事至是
許轉達朝廷 九年八月以右僕射陳堯叟判河陽河
堤事專委通判已下修護堯叟提總之 堯叟以疾求
補外故有是旨優大臣也 天禧三年六月慶州路轉
運使刁湛言雲安軍管一縣戶口鹽井課利最多自來
知軍並差班行失於點檢致欠官鹽不少望依舊例選

有心力強明朝臣知軍從之 四年五月廣南東路運
司言新從春州請於選人幕職州縣內選嶺南人內有
無賊罪者充本州通判兼知州仍量與錫賜及與錄事
叅軍俸錢添支得替日依漳州龍巖華縣惡水土例酬
獎從之 五年六月侍御史燕肅言瓊崖儋萬安四州
之地漢為儋耳珠崖郡地方千里越隔大海久被聖化
戶口滋豐自來轉運提點臣僚以部內州郡數多復又
地里遐遠在一任中少有過海親到者瓊州知州兼瓊
管四州轉運司公事崖儋萬安三州十四縣知州知縣
並係瓊管轉運司專差彼處衙前攝官充補臨理多務
誅剝不便遠民故近年以來瓊州知州羅善長黃建中

繼坐贓污蓋不擇材致此聚敗歆望自今選差曾有近
上臣僚同罪保舉者知瓊州侯得替無遺闕與陞擢差
從之 仁宗乾興元年改即位未六月審官院言準景德
四年十一月詔應廣南諸州軍知州通判選京朝官曾
差知縣者充今詳新轉京官知縣到任及一年已上者
亦依例移差緣廣南東西兩路州軍有戶口稍多處若
一例就差知縣往彼知州頗以優倖今將下項十七州
差合入通判資序人知州餘州即依元詔施行從之

英 英 憲 惠 連 端 潮 康 賀 封 南 雄 昭 象 藤 柳 潯 邕 梧 凡 十 七
州 仁宗天聖五年六月廣南西路提點刑獄司言高
致融三州皆侍禁知州舊有推官闕員已久高融州各

無推官只有司戶司理參軍或是常程公事亦有行遣
失錯况嶺南人民至衆犯罪頗多豁洞相連地里迂遠
全籍長吏詳酌施行若只以資序合入遠官差遣亦未
為便自今前項知州望更選本人歷任勾當公事粗有
能聲者是差遣從之 十月以淮南江浙荆湖發運副使
張綸兼知泰州時是州修捍海堤故命綸兼領其本司
公事仍令往來同發遣 六年正月廣南西路提點刑
司言高州大辟公事兩件相繼翻變已別差官覆勘各
得分明緣本州地接雷化等州海岸刑獄甚繁須藉長
吏發遣竊慮刑獄別有枉監檢會舊差京朝官知州欲
乞選差經歷諳會公事有心力帶職供奉官以上使臣

或却差廉明京朝官知州詔今後選差使臣充知州
是月上封者言朝官充通判經兩任例入知州况一郡
長吏委寄非輕若匪擇人豈能稱職欲望自今並須三
任通判方得差充知州如有殊常勞績及奏舉人數多
者令審官院取旨從之 八月以真楚泗三州路居津
要令審官院選知州 九月禮部員外郎郎簡言與元
府利州知州今從乞選差人從之 七年三月廣南西
路轉運司言融州居枕邊隣地連谿洞見屯兵甲事務
亦繁自來無職官唯知州一員若非得人則致曠敗歆
望自^今選曾親民政諳練邊事強幹使臣充知州從之
五月四日梓州路轉運使李紘言審官院將新及第

人授京官知縣者未滿一任就差充廣南知州緣初官未諳厯事遠荒之地尤藉撫綏兼替回例入通判頗為僥倖乞今後京朝官知縣合入遠地候第二任移充廣南知州詔審官院詳定既而請依紘所奏若遇西川廣南有通判員闕即依例移差如無闕任滿差替其如知縣之人緣有累任監當方入者亦有自厯州縣改^充者綿厯既久望且依舊施行其奏蔭官特賜進士出身差充知縣及未曾勾當特與知縣者亦請依新及第人例^從之十四日上封者言近邊內地州郡多是儒臣知州邊事武畧安肯留意自今選有武勇謀畧內殿崇班已上三二十人於河北河東關西及西川廣南不以遠

近但路居衝要處充知州得替日具本處民間利害或
邊事十件以聞或朝廷有所驅使詢之于朝則曰某人
曾在某處知某處事宜則是先試以近邊之事後委以
臨邊之任或為州郡之防或為偏裨之將不乏人矣詔
自閣祇候已上充知州知軍候替回日知州令言事五
件內三件民間利害二件邊事或兵馬利便其知軍言
事三件內二件民間利害一件邊事或兵馬利便九
月上封者言審官院所差知州自來止三任通判無過
即依次差充或才器凡庸年老病患蓋存格例不復區
別欲望今後所差知州並具官位姓名申中書於宰臣
聚聽時令引出詢問如堪差委即差若庸愚老病即具

事狀以聞乞降等差遣或全然衰老疾病便與分司致仕詔今後定差知州知軍引見後當日或次日令到中書十年七月二日詔大名府真定京兆鳳翔河中江陵江寧七府充鄆青陳許毫襄鄧孟潞并延秦陝譚杭越蘇揚洪泉福二十一州自今知州府並與三司判官轉運使副使一等差遣景祐元年四月二十九日新授江南東路轉運使蔣堂言竊見諸路差武臣知州軍等多是素昧條教不知民事欲乞今後除阨東邊陲之處合選差近上武臣外其餘州縣即乞改差文資仁宗令諭樞密院今後差武臣知州軍並選擇人寶元二年二月二十一日臣僚上言日近差除邊上知州軍臣

僚等乞早推赴任仍合與日限進發勒定到任月日詔
並令乘遞馬限三月十日已前須管到任時以西邊有
警也 康定元年五月十九日都官員外郎何白上言
乞於群臣中擇識理道明撫綏能制姦吏善撫軍旅者
一百餘員代陝西河北河東三路知州軍不材之人苟
一郡之內得一良吏則萬事皆集詔諸路轉運司體量
部下知州知軍有年老昏昧貪濁踰違及非幹勤者具
事以聞 二年十月二十一日審官院言近令臣僚奏
舉河北河東陝西知州人數頗多欲令見任知州到任
一年半差人替二年滿闕從之 慶歷四年正月詔審
官院凡選差知州而通判官高者勿拘 七年六月詔

審官院孟梓利三路並選歷官無私罪人爲知州 皇
祐二年三月一日右司諫陳升之言乞委中書樞密院
考察河北牧守治狀如素來庸常別無他術者宜推擇
有才能之人以代其任詔河北轉運司安撫司體量轄
下知州軍治狀 三年四月江南東路轉運司言知江
州林咸德老昏而通判梅德臣又非才多病請擇人代
之帝曰一州軍民將何寄乎其令咸德致仕德臣罷歸
七月十八日帝宣諭宰臣曰近日職司以長吏不理
而聞者多矣中書未賞施行且長吏者民之性命可不
慎乎宜擇其甚者罷之小者易之文彥博等懇謝而退
故自鄧州王開合州呂士宗等或以衰老或以弛慢而

罷對移者凡十六人 六月汝州兵馬都監楊景宗請
徙知一州帝謂輔臣曰景宗章惠皇太后之弟朕豈不
念之然貪戾之性老而踰甚今與州則一方之民受弊
矣卒不與之 是月詔威茂黎集壁等知州及戎瀘州
通判自今令轉運司舉本路京朝官知縣前任成資今
任一年或前任一年今任二年者為之候滿三年理初
任通判 四年七月九日詔廣西連賀端白等州近罹
蠻寇新差長吏宜令審官院慎擇廉平存無疲困 十
一月詔真楚泗三州自今令江淮制置發運淮南轉運
司連狀保舉如職事修飭代還當除提點刑獄 五年
閏七月八日詔諸路知州軍武臣並須與僚屬參議公

事母得專決仍令安撫轉運提點刑獄司常檢察之
八月詔黎雅州控扼蠻夷為四川之屏蔽自今宜擇武
臣諸司使副以上知州黎州仍置屯陝西兵三百人雅
州二百人置駐泊兵馬都監一員至和元年八月詔
雅州知州專管勾黎州兵馬賊盜公事嘉祐三年四
月詔省府推判官諸路轉運使提點刑獄非體量劾奏
而為知州者並理本資序其朝辭所賜及添支遇恩補
蔭子弟亦如之四年五月詔武臣知州軍非歷路分
分部監一任以上母得差其當差者仍先與小處知軍
九月十五日詔齊密華邠耀廊絳潤婆海宿饒歙吉
連汀潮凡十八州並煩之地自今令中書選人為知州

其知潮州委本路轉運提點刑獄司同保薦之 十一
月詔廣南西路欽廉融三州自今令本路經畧安撫轉
運司舉內殿崇班已上為知州仍帶沿邊溪洞都巡檢
使 英宗治平元年閏五月詔自今大使臣知州軍湏
本轄安撫經畧路分總管轉運使副提點刑獄及內外
待制觀察使已上乃許奏舉。二年五月樞密院言自
今武臣知州軍選歷任無贓私罪者私罪杖以下公罪
體量衡^衡替除差遣候經四任親民贓私罪徒已上而嘗
立戰功酬獎轉官者亦候經四任親民仍臨時取旨知
州軍路分都監鈐轄等如有員闕即與正差不得陳乞
理為資序從之 十一月三日御史知雜呂誨言乞除

擬知州人引見日令上殿親有所問又使中書閱其可
否然後授之詔自^今鄭^充曹蔡相邢同晉壽湖明宣河
中等知州府辭見許上殿。三月十二日樞密院言自
至和平降詔後凡諸司使知州軍並乞帶兼鈐轄蓋自
誤用上條令欲差除武臣知州除須合兼鈐轄去處外
餘並只用兼管勾駐泊軍馬公事著為定式如前任資
高令來所差知州軍不是責降即許理為資序其正任
防團已上知州自依舊制從之。神宗正史職官志知
州事通判州事各一人府軍監事如州視地望重輕以
資級應選者^見藩方劇郡則通判二人知州掌郡國之
政令通判為之貳凡其屬有七判官推官掌受發符移

分案治事兵馬都監掌訓治兵械巡察賊盜錄事司理
司戶叅軍掌分典獄訟司法叅軍掌檢定法律各一人
皆以職事從其長而後行焉凡降赦條制先詳意義注
於籍而下所屬歲時勸課農桑旌別孝義其戶口賦役
錢穀應聽斷之事率舉以法若不能決則稟於所隸監
司屬縣有令有丞有主簿有尉主簿鈎稽簿書尉專捕
盜禁物餘事與令丞通治而倉庫酒權各有監臨官以
分掌之雖吏員多寡及節度觀察推判官掌書記支使
有無繫於州府軍監之高下而典領職務則同焉
宗正史職官志諸州府置知州事一人州軍監亦如之
掌總領郡務宣布詔條以教化導民善而以刑罰糾其

姦慝歲時勸課農桑旌別孝悌其戶口賦役錢穀獄訟
聽斷之事率舉以法凡兵民之政皆總焉屬縣事令丞
所不能決者總而治之又不能決則稟於所隸監司及
申省部凡法令條制先詳意義注於籍而行下所屬有
赦宥則率官吏宣讀而班告於治境舉行祀典察郡吏
德義才能而保任之若疲軟懈怠或冒法則隨職事舉
劾遇水旱以法賑濟及安集流亡凡郡邑詳瑞及民有
孝義可稱者據事實以聞若河南應天大名府則兼留
守司公事太原府延安府慶州渭州熙州秦州則兼經
畧安撫使馬步軍都總管定州真定府瀛州大名府京
兆府則兼安撫使馬步軍都總管瀘州漳州廣州桂州

雄州則兼安撫使兵馬鈐轄潁昌府青州鄆州鄧州則
兼安撫使兵馬巡檢其餘大藩府或沿邊州郡或當一
道衝要者並兼兵馬鈐轄巡檢都監或帶沿邊安撫提
轄兵甲沿邊溪洞都巡檢餘州軍則否其屬官有無及
員數多寡皆視其地望之高下與職務之煩簡而置之
。治平四年閏三月神宗即位未改元詔齊家鄭華鄆願
耀鄺絳潤婺海宿驍歙吉建汀潮等十八州並係嘉祐
中詔委中書選清幹臣僚差充近年該堂除知州人多
直指射有違詔約今後應堂除知州於上件員闕自合
聽候中書掄選並不得陳乞指射是月詔今後知州
如兩考俱在劣等即展二年與監當差遣以知隋州考

惟實為考課院定到政迹第一年為中等第二年為劣
等有旨特展一年磨勘與州郡監差遣因有是詔 九
月二十六日詔諸路知州府帶安撫或總管都鈐轄并
京府令後長吏闕員並令轉運使副提點刑獄兼權餘
只令通判權行發遣如別有總管鈐轄即兵馬公事牒
與總管鈐轄 十二月十八日考課院言準嘉祐六年
閏八月詔轉運使副提點刑獄每歲終定部下知州軍
一人能否尤著者為優劣如連二考俱在優等即具以
聞當議特行賞罰看詳新知廣濟軍祕書監況正辭前
知衛州係治平二年三年河北都轉運使元絳轉運使
無度沈立提點刑獄沈扶韓琦連二考為優等乞賜詳

酌詔降勅書獎諭仍差知襄州 神宗熙寧元年正月
二十九日原係臨涇縣令鮮于師中上言乞於利閬興
元間別置一帥夔峽亦置一帥以為四蜀維持之勢詔
利州路興元府今後依真楚州例堂選人知州事夔州
知州樞密院精加選擇 二年八月詔今後真楚泗州
令發運使副精加選擇同罪舉充如無正知州人即許
奏舉第二任通判人權知 五年八月二十七日詔陝
西丹州寧州隴州河北永寧軍永靜軍知州軍自今叅
用文資為之 八年二月二十九日以潭州通判屯田
員外郎趙楊權知邵州今後仍互差文臣從本路轉運
司所請也 元豐元年五月七日提舉茶場司言彭漢

知州許本司權奏辟如能協力保明留再任從之 八
月八日詔知順州西上閣門使康州團練使陶弼（為）
上閣門使以嘗得旨順州知州先轉一官候及一年更
轉一官任滿陞一任時弼到任一年也 十二月四日
詔內藏庫副使權太原府路鈐轄張世矩罷兼知火山
軍以河東都轉運司言準詔具土人武臣知州軍者以
聞世矩府州土人故也 二年四月十七日廣南西路
經畧司言賓州瘴癘加以兵火之後難得官願就乞差
殿中丞吳潛知賓州從之 同日詔尚書司勳員外郎
韓晉卿等知壽州先是晉卿自大理出初知同州上以
晉卿非次替罷特與一見闕故易之 三年正月二十

二日賜故知瓊州俞珉家銀五百兩以本路言珉在海
六年不得代而死故優卹之 三月二十七日詔瀘州
自今差武臣各帶本州沿邊都巡檢使遇有邊事與兵
官照應出入從梓夔路鈐轄司所請也 十月三日詔
應川峽人連任西路知州者不得過三任 十一月三
十日詔詣路監司具到部下知州通判治狀最優有未
經朝廷任使者令中書籍具姓名 四年九月十五日
詔陝西河東次邊近裏州縣北自議兵之初朝廷便選
擇守令者不惟欲供辦軍需與轉運之官叶力蓋以部
內兵民一朝悉發遠從征討則肅察姦宄綏靖鄉廬乃
所責任可以朝廷之意丁寧申諭俾各遵守苟能於兵

火未還之間警察盜賊鎮撫部民各獲安居當議旌褒
顯擢職事 五年正月二十六日客省副使知誠州謝
麟言本州旁近戶口或遠隸他州見有封疆不足城守
乞增割戶口山川并降屬縣名額詔沅州新修貫堡托
口小田豐山堡寨係控扼蠻蜚形勢之地宜以瀕渠河
貫堡寨為治所合置渠陽縣隸誠州仍以麟知沅州主
管沅誠州沿邊安撫公事置兵馬監押職官戶司叅軍
各一員並令謝麟舉官一次誠州官滿依沅州酬獎
七年八月二十四日詔堂除及吏部使闕知州自今三
年為一任 二十九日詔武臣知州軍及軍使並三年
為一任 十二月十七日詔黎茂威三州知州委鈐轄

轉運司依選格奏差 八年七月十二日詔今後知州
年及七十不許奏舉再任 哲宗元祐元年閏二月二
十八日詔今後差知西京大名應天成都太元府永興
成德軍秦延青郛杭瀛定慶渭熙廣桂州並待制已上
人曾任正提刑已上即權餘並權發遣其兼安撫總管
等自依舊條其知河陽荆南江寧潁昌河中鳳翔陝府
陳宛襄鄧潞陽毫蘇越河潭泉福梓徐曹蔡鄭滑相
同晉廬壽湖明宣滄齊隸州已上并差曾任正提刑人
餘並權通判已下資序權發遣其見任提刑已上因差
知州軍即具歷任取旨 六月一日詔新復郡縣知州
州軍並堂選餘吏部選差 十月四日詔內地及川廣

知州堂除人外並以三十月為任 十二月二十二日
詔堂除知州成資為任 二年六月二十四日詔三京
及帶一路安撫總管鈐轄知州闕轉運提點刑獄官兼
權餘州以次官或轉運司選官權攝武臣知州闕安府
鈐轄司選官權內西北陝西安撫本路闕官許牒轉運
司權差先是武臣有闕帥臣與監司互差定州安撫司
以為言著為令 十月八日詔知賓橫州悉用武臣即
有警使以兵互應 三年六月一日更部言熙寧敕知
州通判川廣一二年為滿元豐敕川廣以三十月元祐
敕知州通判並以三十月為任即不分川廣許川廣知
州除有專法指定及酌獎外不以見任新差官並二年

為任其使闕滿替悉依本法從之 二十二日詔邢趙

州守臣今從互差武臣從安撫使滕元發請也 十一

月十四日詔辰州知州自今互差文武官 四年八月

八日詔河中鳳翔邠涇自今並選差守臣從文彥博請

也 五年十二月二日詔成利都夔路轉運司知州軍

監闕官並依差權繁難縣指揮施行從夔州路轉運司

請也 六年六月十二日樞密院言元豐七年中書省

條堂除知州軍三年為任武臣依此元祐元年指揮以

成資為任武臣未曾立法詔武臣任六等差遣川廣成

資餘並三十箇月為任 八年正月十二日荆湖南路

安撫鈴轄轉運提刑司言全邵永州係沿邊溪洞其知

州望委逐司選有文武材畧人同奏舉詔令後吏部選
差文臣 紹聖二年六月二十三日知永寧軍劉宗卿
言應武臣知州軍處遇災傷降不下司敕令轉運司牒
與通判同掌無通判處同簽判掌之因災傷為盜罪至
死者守貳同決從之 四年正月七日詔丹州知州令
後令樞密院選差武臣 二十五日梓州路轉運司言
乞今後知州並許通差川峽人從之 徽宗崇寧元年
九月二十五日詔邢趙辰州守臣自今依熙寧差武臣
罷互差指揮 二年正月二十六日中書省言四川地
遠軍防不修乞利州夔州依成都府例各置鈐轄成都
府舊以便宜從事罷去已久乞軍民所祀臣寮者令酌

情處斷四川監司鈐轄大州守臣不差蜀人所轄兵馬
東軍與土人參用如舊法從之 三年二月二十一日
詔深洛磁州國信道路經由知州並令吏部依格選差
申三省審察 四年閏二月四日中書省言昨自元豐
肇新官制隨事之宜分隸六曹總領職務各正名實比
者開封已正尹牧惟外路州縣等處尚循例舊而所置
案名未曾體倣官制隨事分隸致主行事務叢雜今體
倣六曹為六案各依六曹所主事務行遣庶中外事體
歸一其有該說未盡事件悉合依倣官制格目承行及
主行吏人既隨事分撥輕重不同自當量事繁簡約度
合銷人數從本屬當職官隨宜均定所有常平等事合

係常平免役案主行并開拆司知雜案自合依舊外詔
令路監司行下本路逐州軍等先次令相度增損前期
分撥釐正已定申本司再行相度施行訖申尚書省
大觀三年四月二十八日戶部侍郎蔡居厚奏檢會已
降詔旨吏以罪去多緣赦宥或由推擇更付以郡寄然
罪有輕重繫以與之則害民廢法無所懲艾自今情理
深重者勿與知州差遣乞應以罪能或送吏部及過赦
牽復之類雖係知州資序者並依詔旨從之九月八
日詔萬安軍知軍今後令樞密差武臣政和元年八
月二十四日詔諸路州軍今後守闕並仰遵元符條令
仍令提刑司走馬承受常切覺察如舊弊不革即速按

劾聞奏議加黜責時河北帥臣言本路州郡暫闕守臣
握攝多非其人率皆貪狠不遵詔令於民利害畧不加
省元符令諸三京或兼一路經畧安撫總管鈐轄知州
闕轉運提點刑獄官兼權餘州以次官或轉運司選差
武臣無知州即安撫鈐轄司差官故降是詔 五年十
二月十三日陝西路轉運司席貢言乞沿邊知州闕令
本州通判兼權其兵馬職事令帥臣選武臣權不得干
預郡事從之 六年五月八日手詔藝祖深鑒王季藩
鎮得自置立而馴致專恣比來諸路帥司黃緣請求數
乞辟置守臣侵紊國法漸不可長自今有託邊事辟置
守臣者以違制論 宣和元年十二月二日詔今後四

輔知州差待制已上

三年四月二十一日中書省尚

書省言江浙淮南等路宣撫使童貫奏切詳江浙州縣
經賊去處整葺事務全藉守令得人方可辦治若又只
循常法注授或未曾經歷民事兵火之後豈可更失撫
馭乞江浙守令內杭睦歙衢婺宣處州除已係朝廷日
近選擢及宣撫司奏辟外其餘並乞朝廷遴選累歷州
縣熟知民事無過犯人仍並以三年為任勿復替移任
滿課績顯著特乞優異推恩所貴有以激勸從之 閏
五月一日詔恭渥兩州大寧監監課係余木應副夔州
路州諸可令本路漕司踏逐才幹清強官充知州監任
兩無遺職保奏 十二月十七日詔嚴州守臣依舊差

文臣 四年二月八日臣僚言近有部寺監官以疾請
者皆與之郡臣謂郡守非養病之地其真以疾請者皆
宜休之祠館不絕其祿若郡一失守千里受害應曾任
或見任省寺部監長貳及監司以疾請而與知州軍者
在京令御史臺在外令監司驗實以聞與宮觀見任知
州連軍被疾者準此 六年閏三月十八日臣僚言言
臣聞王者之於農也非特躬率之必有教督之言焉雖
守令勘課著在甲令然比年以來但知考課之文究其
誠心惻怛如古田之制未易得也伏望申嚴守令勸課
農桑之法然恭率弗虔徒為文具即令監司按劾以聞
從之 七年八月十日瀘南沿邊安撫使黎揆言本路

沿邊施黔等州皆係武臣知州即珍州與施黔州事體
一般欲望將珍州守臣依黔州守臣武臣詔特依奏
三十日詔蜀漢彭邛興劍犍雅利知州今後並堂除
依格人 九月五日詔今後守臣依已降處今並三年
為任毋輒更易 十月二十六日詔今後守臣緣事改
移或因罪罷並仰據任內所管歲計錢穀金帛之類收
支見在數目開與後官照會覈實保明申尚書省 高
宗建炎九年五月七日詔河北路京東西路除帥司外
舊差文臣知州去處許武臣武臣一次 七月二十日
詔要郡文臣一員帶本路兵馬鈐轄武臣一員充副鈐
轄次要郡文臣一員帶本路兵馬都監武臣一員充副

都監令逐州改正稱呼。十二月九日詔應州郡守臣
遇有緣事改移銜罷並候後官交割職事畢方可離任
去職。十月二日詔洪州分寧知縣陳敏職特與松江
知州軍差遣先是臣僚言朝廷比緣防秋選擇郡守頗
患乏才然猶未聞取已前忠義不屈有已試之効者不
次而用之且如洪州分寧知縣陳敏職說諭邑人無得
降拜至披胃示衆云若欲降拜請先殺我衆遂從之邑
中以寧朝廷雖使之遷官矣未聞委以郡寄無以為忠
義之勸歆望深詔大臣取前日保護城邑守節不屈卓
然有功之人如敏職之類者不以其官之高下起遷郡
守之任庶幾緩急可為倚仗故有是命。十一月十二

日臣僚言切以郡太守之職總府庫甲兵之重官府士
民之重任專城之責者也雖間出公門則兵官坐甲仗
庫以儆不如甲令行縣則委之叅佐承平乃爾矧當擾
攘易搖之時一郡安危尤繫於守臣之動靜不可不察
大江之南凡有寨堡不知其幾郡而太守躬行按視始
於婺州繼以信州既皆得請切恐此命一下援例而請
者繼踵而沓至迨此盛冬正當嚴加防扞之時風傳小
警為守臣者皆諉事於其副而遠走外邑則江浙諸郡
守臣棄城郭者往往而是則東南之勢將何恃以自保
乎倖貳素無守將之權且任責匪專其下必不信服一
朝驟當專城之寄必有不勝任者人見太守委城而出

群情動搖必有震驚遁走者守臣既行必分兵自衛姦
人窺伺必有乘間而竊發者邑去郡遠者或二三百里
若令行諸縣半月之程決不可回託事出限誰復察而
制之彼既挾按行之旨緩急可動而城守保民之意既
已不專則防禦杆敵之謀必未盡力其患可勝言哉乞
將所降兩守臣躬親按行寨柵指揮乞更不施行專委
通判同本縣令佐嚴加檢察重以賞罰從之。十九日
詔岳州知州銜內許帶本路兵路都監以知州宗炳言
岳州係節鎮自來銜內並帶本路兵馬都監緩急有警
庶幾可以處置本州兵將之類今來晒所授敕命銜內
毋之切慮合帶故有是命。紹興元年正月八日知越

州陳汝錫言諸路守臣並許節制管內軍馬除逐州輒有緩急事宜合依前項指揮聽從本州守臣節制外所有事干一路軍政及合隸帥司差發之類並合遵依舊法施行詔申明行下 二月十七日詔今後守臣在任改差並依昨降指揮候新到官交割訖方得離任 三月一日建康府路安撫大使呂頤浩言自近行在前來赴任經由臨安府嚴妻衢信等州切見知嚴州柳約如衢州李處勵去冬措置寨柵一一可考皆依山據險控扼衝要使賊馬不奔衝若不肯事難避事毅然之任處勵謹守一邦使無它望朝廷雖曾推賞盾之公議似未當切兼二人者吏畏民愛治狀可觀詔柳約李處勵各

進職一等是日進呈上曰守臣治郡有勞但當進職不必數遷李回曰漢宣帝時守臣有治効輒有璽書增秩賜金意亦出此二年閏四月六日新除顯謨閣直學士左朝教郎知平江府李彌大言平江府係鄉貫所在乞改除宮觀詔彌大為係從官特不避本貫七月一日詔知太平州許端夫特許終任以被言章別除守臣蒙本路安撫大使李光并監司備據民戶狀乞舉留終滿故也十月三日臣僚言近聞諸郡守臣有以罪罷而新官未至者皆以近降候新官到交割指揮之故猶復在任往往自以為既罪不復顧籍豈徒廢弛職事殆有縱意所如肆為不法者欲望令守臣應改移差遣及

罷更不候新官到先次罷任委本路運司選以次見任
廉幹官權行主管帥臣則令監司權之如此則守土之
臣常得其人不至為千里生民之害從之 三年二月
十二日臣僚言比年以來州郡守臣並帶本路兵馬都
監既與異時沿邊事體不同又於今日諸州統制無補
徒署名位以成虛文欲望寢罷仰副陛下總該名實之
意詔見今要郡次要郡守臣帶路分都監去處並罷
十月十一日詔知泗州徐宗誠候任滿日特令再任先
是泗州百姓等六百九人狀切見知州徐宗誠到任以
來本州城郭屋宇漸有營葺郡人歸業頗安其政能自
儉約知民疾苦前此境內皆食草實本官以私錢辦牛

畜糧種課民耕鑿分給之外軍儲亦足人人皆得粒食
歆乞特令本官再任故有是命。八月三日宰執進呈
薛徽言與郡上曰徽言得無資淺乎郡守唯當擇累歷
之人祖宗朝兩任知縣方作通判兩任通判方除知州
然自諳練於民事更須久任勿委移易如此天下安有
不治哉 五年七月八日中書門下有言應郡守初自
行在除授及自外罷任赴闕並令引見上殿勘會官員
新除郡守緣有闕期未到若依已降指揮上殿切慮難
以久待班次詔新授郡守除見闕人外餘並免上殿
十月二十二日宰臣趙鼎等言近來邠民之詔數下而
州縣之吏往往奉行不虔使百姓不受實惠上曰守令

皆帶勸農公事多不奉職農者天下之大本也可不重乎然其要當在擇人如或守令有治効顯著者可令中書省籍記姓名特加擢用 二十五日右諫議大夫趙需言比年以來郡守更易不常固有交印視事席未暇暖人復改命或與他州守臣兩易其任然公帑每遇到罷例依各有饋送多者數百千少者亦不下三二百千初到任人既已收受饋送或移之他郡亦復如之凡一易守臣則所費必倍到任已踰年而更易者猶之可也其間却有止經一兩月遽迎遽陟而受兩處饋送顯屬重疊枉有支費公帑所入有限例冊所定有常一或過多則供湏何以取足必責之庫官庫官無策必仰之酷

息醋息不充必哀之寺觀以至受納禾米多取於民資
其出劑以助供須唯庫官受納官相為表裏則無復累
露此今日之深弊也臣伏見昨降聖旨灼見茲弊令教
令所立法故當時詳定到條令諸監司知州非任滿替
移雖有例冊饋送罷任之物及受之者並受贓論善矣
然講究尚有未盡止不許受罷任之物而到任未久改
易他州者未有明文敬乞應守臣兩易其任在半年內
者不得重叠受到任饋送如違守臣及庫官並以贓罪
坐之其監司到任未久遇有改易者准此從之 六年
五月十二日都督行府言已降指揮劉洪道除知襄陽
府條上流重地密鄰僞境敬乞依陝西五路例許帶京

西南路安撫使從之

七月八日詔太平州池州江州

興國軍鄂州岳州並以三年為任餘並依舊以中書門

下省勘會松江州軍係為控扼去處故也 九月二十

一日詔宜州守臣兼帶提點買馬其合行事件並依邕

州已得指揮 二十三日三省言知明州仇愈知衢州

吳革知處州呂丕問並究心郡政戢吏安民理宜褒陞

以為良吏之勸詔仇愈與轉一官吳革與陞一職呂丕

問除直祕閣 十二月二十一日提舉淮南西路公事

張成憲言淮南守令賞典重疊遂啟僥冒之弊歸業民

戶皆係旋營耕墾若州縣撫存不擾自然戶口漸增耕

墾日廣欲望將守令歲增戶口并墾田土及知縣任滿

聖田酌獎併入任滿賞格乞量與增重庶格冒賞詔准
南守令開墾田土增招戶口即從一重推恩 二十六
日中書門下省言荆門知軍舊係文臣窠闕昨因殘破
之後一時權差武臣今來自合依舊正差文臣詔續載
改差知荆門軍 八年正月六日宰執進呈臣僚言章
乞今後從官知州不許便衙見任人趙鼎奏曰祖宗以
來待遇從官無異庶官遇宰執無異從官則非朝廷之
體陳與義奏曰人臣亦何有重輕但堂陛之勢不可不
存秦檜奏曰嚴堂陛乃所以尊朝廷也 十二月十七
日宰執進呈湖北宣撫司乞差胡邦用知靖州上曰郡
守牧民之官亦藩屏所寄當自朝廷選差若皆由將帥

辟置非臂指之執也 十八日殿中侍御史鄭剛中言
切謂承流宣化莫先於太守今日之勢尤急於邊郵如
楚泗通泰以至滁濠江鄂接連襄鄧關陝之地為今邊
郡者大畧不過二三十郡委以與人誠不可忽願詔大
臣將諸處見任及已除未及赴之人精加審察訪求材
術之士畧其細行但平時績効著聞實可任用者精選
二十餘輩布之邊郡使其講究利源招徠士卒種植牧
養蕃息疲瘵分委既定時遣朝廷官吏按行省察取其
無狀者復更易之俟其處處得人則須以持久增秩賜
金之事可行也從之 九年五月十二日中書門下省
言諸州守臣並二年為任昨降指指揮兩淮并沿江三

年為任今來自合與諸守臣一等詔應守臣並以二年
為任 八月十六日宰執進呈司勳員外郎李公懋劄
子兩淮重地乞令侍從近臣鎮撫上曰朕用人材初無
內外之間士大夫既為近列多擇善地至兩淮新疆輒
復固辭今後差除擇其避事辭難之人重行黜責 九
月四日臣僚言紹興令命官移任已受告敕者解罷知
州須候替人考之舊章本無此法蓋自建炎之初盜賊
蜂起所在州郡無復固守之意見在任者營求脫免未
到官者迂延規避苟得夤緣委之而去於是言者建請
見任守臣雖有移命須候替人此在當時固合事理其
後新書既成遂為著令至今遵行欲乞明詔有司刪去

此條一循祖宗舊制吏部看詳今來臣僚所請緣本部
見遵守紹興二年十月三日指揮施行所乞刪去紹興
令乞下敕令所從所請刪去施行從之 十四日宰執
進呈樓炤言差郝林知陝州上曰陝川合差是何臣僚
秦檜曰係舊差文臣去處上曰武人作郡往往不曉民
事又恐恣橫今日所還州郡久陷夷偽尤須守臣得人
使之愛養百姓武臣非所任也可自今只差文臣 十
五日湖北經畧安撫使司言准臣僚奏欲乞將湖北路
辰州守臣依邵州例今後遞差文武臣契勘辰沅靖三
州皆係沿邊去處內靖州舊係溪洞誠州先蒙朝廷改
作渠陽軍後來省廢再於崇寧元年復置改渠陽軍為

靖州最係極邊去處今相度可依舊只差武臣知州外
其辰沅二州不全係極邊合遞差文武官從之 十一
年三月四日臣僚言應兩淮控扼去處其守臣悉易武
臣從之 七日德音應殘破州縣所差官除已有立定
到任賞格外今收復之後如守令能措置安輯流亡勸
課農桑早見就緒者令本路監司保明事實以聞當議
更與優異推恩仍加擢用 十三年四月三日上諭輔
臣邵政以循良稱者便與擢用庶可為諸郡守臣之勸
今兵事少息當以民事為先卿等宜博詢之 閏四月
二十七日上諭輔臣曰昨日上殿楊大任狀觀其人物
昏老難當郡寄可以宮祠處之似此等人作郡臺諫欲

論列又却別無過顯只是昏耄郡事不理千里之民陰被其害今後差郡守卿等切宜審詳奏檜等曰謹遵聖訓六月二十九日上諭輔臣曰朕頃嘗下詔令守臣到任半年以上具民間利病或邊防五件聞奏近觀諸處所奏其間固有法所該載者亦有一方利便朝廷所不知者宜委都司看詳有便於民即與施行無事虛文九月二十日禮部言權發遣建昌軍李長民奏宣和以前應知通令佐階銜並帶主管學事自軍興以來學校之教中輟今和議既成儒風復振宣化承流責在郡縣所有主管學事謂宜依舊結銜以示聖朝偃武修文之意本部下國子監勘會昨行三合法除從官以上知

郡係帶提舉學事餘郡知通縣令佐並帶主管學事今
諸路監司既已選有出身或從上一員兼提舉官欲依
李長民所乞令郡知通縣令佐依舊例帶提舉或主管
學事結銜從之 十四年七月四日上諭輔臣曰京西
襄陽府一帶宜擇守臣庶不生事秦檜曰當依聖訓
十五年九月十三日詔諸路知州帶本路安撫使如見
係帶待制以上職任今後舉官與作職司收使從吏部
請也 十一月十九日權廣南西路提刑吳彥璋言管
下諸州多連溪洞守臣拙於綏撫往往輕易生事動經
歲時不唯廣害生靈兼亦枉糜經費欲望戒令不擾唯
務靖安一任之內若無邊事優加賞擢其生事之人重

輔

疆

宜作經

賜斷遣詔行下本路遵守施行 十六年十月十三日
上諭轉臣曰今天下無事民事最急監司郡守須擇人
得其人則為縣者有所畏憚不敢恣縱蓋縣官皆是銓
曹依格差注難別賢否全在監司郡守考察如昏謬不
任事者別與一般差遣清疆有才力者宜擢用之 十
七年七月二十五日宰執進呈左朝散大夫謝尋擬差
權知潮州左朝奉郎陳惇特差知饒州右承議郎林琪
差權知忠州上可其奏因宣諭曰凡除郡守莫須到堂
否秦檜曰例須叅辭上曰今既休兵正以民事為急卿
宜加詢審如有昏耄無取恐不能宣布朝廷愛民之意
不若只與宮祠 十八年十一月八日上諭輔臣曰荆

南重地帥臣不可不選擇軍興以來多差武臣今疆場
安靖可依舊選文臣庶能舉職 十九年二月二十三
日上諭輔臣曰今四境寧息沿邊守臣務在安靖若任
滿別不生事可量緊慢取旨推賞 二十一年十月二
十八日宰執進呈右宣教郎守大理正張曦奏乞應州
郡常程文字並用木匣實封令遞鋪或祇候典轉送下
縣縣復責令承帖人付鄉村上曰公人下鄉止是搔擾
朕頃在河朔親見其弊可檢坐見行條法申嚴行下
二十三年十月二日侍御史魚崇政殿說書魏師遜言
郡守之職分民共理委寄非輕考之格法如年及七十
已自有礙今有尸素恬然冒居而不知去者非唯不應

格法臣恐昏耄適為民害今欲令許其自陳宮觀庶幾公私兩得其便若猶有志在忝竊不自退省者仍望朝廷取索職名姓名與理作自陳宮觀從之 二十五年六月二十六日刑部員外郎張儀言郡縣長吏間有連日不出公廳文書訟牒多令胥吏傳押因緣請託無所不至鄉民留滯動經旬月至有辨訟終事而不識長官面者如此則豈能盡民之情宣上之德欲望申嚴今後守令非疾病或假不許不出廳治事仍令監司常切督察從之 八月六月宰執進呈乞差侍從兩員同看詳守臣到任所請裕民五事上宣諭曰守臣陳獻利害當令國與民皆足乃為稱職如建炎間時方艱難財用匱

之翟汝文知越州乃盡放散和預買及鑑湖官租不恤
國計而專欲盜名如此等人國家何所賴也秦檜曰陛
下咸中興之功而知民疾苦保惜生靈盖漢宣帝光
武之事業上曰朕何敢望二帝然志所深慕焉於是差
權刑部尚書韓仲通權戶部侍郎曹泳同共看詳二
十六年三月十一日右正言凌哲言自江以北諸路州
軍殘破之後尤宜遴選望詔大臣均擇循良之例以為
郡增嚴殿最之法使知激勸從之 四月三日詔應自
今知州通判互論不法事件並須拘留在任選委監司
之清正有風力者依公究治取見詣實曲直情狀施行
從右正言凌哲請也 十月二日宰執進呈武德郎向

世禧差知賓州上見履歷狀係內舍生問世禧豈武舉出身者湯思退等奏元是襄陽府府學內舍生後因獲賊補官前任東南第十二副將上曰士人必知民事如此差除甚善 閏十月二十三日樞密院進呈武經郎王恪擬差知靖州上曰靖州公邊其溪洞人本不敢生事只緣官吏不得其人因省地人欺凌蠻徭或買物不還錢遂致殺人生事若撫馭得其宜安有不安帖湯思退曰蠻徭雖不知禮義然亦守信聞與省民交易盡地為期多因失約遂成怨怒陳誠之曰恪久任湖南兵官頗諳彼中風俗必能副陛下使令上曰善 二十七日中書舍人王倫言近省詳諸州守臣條具到裕民事件

其間亦有五事之內唯二三的實餘皆細務及本州自合奉行之事取以充數而已類非民間緊切利病以此却恐利病稍多去處亦為五條所限不得盡言夫多者必損少者必增切慮日久浸成文具欲望應今後諸州守臣裕民事件不拘五條之數或多寡唯務的實庶幾有以上副陛下務施實德之意從 二十七日八月八日詔諸路監司帥守常切互相覺察應所屬見任州縣等官不應迎送而輒出迎送與不應受而輒受之者並須依公案舉寘之典憲其或徇情容庇仍委御史臺彈奏 十一月十九日宰執進呈左正言何溥奏欲望特詔大臣自今郡守毋庸數易其有治狀顯著必俟滿秩

而議甄陞倘或少有過差亦希下章以詭求效上曰此
論切中時病然亦近有因事移易者自今非甚不得已
且令成資宜常切遵守宰臣湯思退等奏曰豈惟郡守
監司亦然諸路監司昨因臣僚薦舉除授至春間往往
滿替將來欲於卿監郎曹中擇其資淺者令中外更代
皆至成資而罷上曰如此不惟免迎送之擾亦可革內
重外輕之弊矣十二月十二日上諭輔臣曰監司郡
守固當久任然其間有瘥老疾病之人使之在職亦有
有利害益移易差遣慮有煩費及迎送之擾耳與其職
事廢弛貽患一州一路此利害孰輕孰重今後如有此
等可與宮觀仍理作自陳沈該等奏曰久任常法也至

於癯老疾病合行罷遣有不得已者當依聖訓施行
二十八年正月二十七日詔諸州縣今後止許守令出
郊勸農不得別行差官每歲並用二月十五日仍不得
將帶公吏及因而遊翫飲酒搔擾其勸農飲食並依時
價折錢給付父老仍多出文榜曉諭人戶知悉并下諸路
監司常切覺察如奉行却致搔擾去處即依前項已降
指揮按劾施行無致違戾 七月七日右正言朱倬言
四川郡守凡赴新任舟輿器用靡不備具又需黃金以
為人舡之直多至五六千緡少亦不下三四千緡就移
鄰郡其解罷者亦不少損其數欲乞明詔有司俾之立
法自今為郡守者敢復如所陳並以贓論監司隱蔽不

劾許臺諫論列從之 九月十九日知新州宋曉言條
具裕民事一諸州軍守臣到任之初經理財賦既去替
將近或改易差遣往往便將本處見在歲計錢糧私情
恣意非法妄用轉運司不為監察遂致財賦率多闕乏
而搔擾及民乞下諸路轉運司常切約束及取索州軍
守臣到任一年收支若干并去替一年月分取支若干
比較多寡開具夾細窠名帳狀并守臣職位姓名保明
申請增廷付戶部審實稽考如有稽添非法妄用不應支
使錢物本從部具因依申乞朝廷當將職官取旨黜責
施行一比者連拜詔旨戒飭監司郡守不得觀望當路
挾情徇私劾賊之污吏明以賞罰於法郡守不得而專

誤或所部有實犯罪仍與通判同銜按劾欲望特降處
分應所部有實犯守臣具事因牒報通判同銜具奏如
所見不同或守臣增加罪狀或於法親嫌應避限兩日
具事因回報仍先次申尚書省若出違日限守倅互有
容庇即是有違詔條乞下所司嚴立法禁戒約從之
十月十二日詔監司郡守除命既下即日起發或以疾
故力丐祠祿必俟終滿方許別有陳乞如或違戾令御
史臺糾察以聞 三十年十二月四日宰執進呈差諸
州太守上曰朕請見秦檜每論除授必曰臣未知其人
心術如何恐招物議似未為確論且人心不同各其如
面若之何盡知其心術然後除授朕謂果知其賢才固

當用之不然采之公論若國人皆曰賢如何不用借使

繆濫旋行罷黜亦惟公論但使不容私意無所不可

中興會要孝宗紹興三十二年元未改七月十九日新除江淮

東西路宣撫使張浚奏兩淮守貳縣令闕官尚多欲望

許令宣撫司奏辟次從之隆興元年八月八日詔曰

朕惟共理允賴守臣比年以來迂易靡定欲使宣化承

流民安田里難矣載嚴成法每徇私恩今後郡守須到

任二年方許差除二年二月十三日宰執進呈擬差

韓彥直知舒州上曰親民之官不可輕授寧與在內清

要官宰相湯思退奏彥直嘗為郎官張浚奏彥直嘗為

成閔隨軍漕上曰更且試之以事它日可以親民付之

州郡未晚率執退相與言曰上於州郡不輕付人如此可知願治之意也十一月二十五日詔郢州係極邊去處守臣見係文臣可令韓仲通趙搏選擇有心力兵官一員將帶本管軍馬前去兼知郢州十二月六日湖北京西路制置使韓仲通言趙搏契勘武節郎本司後軍統制王世顯臨敵果勇素有心力欲令本官將帶軍馬前去兼知郢州從之乾道元年六月十九日詔曰朕從鄰好息兵方務內治安衆近因遣使就令體訪兩淮之民徧歷四五百里僅存數十家此守令勞來安集之無効也朕何賴焉自今其痛革偷惰專務撫綏思拯瘡痍早息愁嘆若漁取煩勞固奪陂澤飭師耽宴

飲佞上欺下營私背公有一于此必罰無赦臺諫監司
常切檢劾仍將詔諭各置守令治事之左右以為朝夕
之戒二年六月十一日中書門下有言勘會已降指
揮非曾任守臣不得除郎官著入條令詔於守臣字下
添入及監司三字條令字下添入提舉市舶司五字
四年五月十四日詔今後大辟罪展委長吏於聚錢之
際詳加詰問二十六日尚書省言勘會二廣州軍多
係荒僻瘴癘之地無人願就有久闕守臣去處詔令諸
路監司帥臣依吏部破格外於見任得替待闕寄居官
初任通判及第二任知縣資序及內選辟申朝廷給降
付身二十九日諸路總領所今後於歲終將所管州

軍合發錢物十分為率若拖欠及二分知通各展二年
磨勘或欠數太多取旨如了辦數足各與減二年磨勘
從准東總領呂權之請也 十一月一日知樞密院事
四川宣撫使虞允文言龍州與綿劍利州接境西行七
日始為文州不可謂邊郡國初知州係文臣慶厯年因
有西夏事宜臣僚建明龍州去文州不遠改差武臣往
往知有兵不知有民伏乞依祖宗舊法改差文臣詔令
後通選差文武臣 五年三月十三日樞密院言康州
欽州融州賓州橫州雷州南平軍永康軍黔州施州宜
州西和州階州邕州萬安軍靜江府瀘州沅州辰州夔
州靖州全州文州龍州武岡軍舊法知州並差武臣詔

靜江府夔州瀘州用文武臣通差餘並依舊法 十七

日詔請邕宜欽廉州知州文武臣到任並各與減三年
磨勘其奏補子孫及眷親條格指揮更不施行內邕州
舊州不該載任滿耐賞外餘州並各與減三年磨勘

同日樞密院言舊法三省樞密院互差文武臣知州邵
州澧州常德府並添入文武臣通差知州真州楚州通
州高郵軍滁州盱眙軍泰州安豐州光州舒州和州濠
州無為軍均州光化軍鄧州隨州信陽軍桂陽軍成州
鳳州興州黎州雅州茂州威州石泉軍大安軍珍州叙
州長寧軍德安府郴州瓊州昌化軍吉陽軍廣安軍高
州鬱林州雲安軍使詔今後可依擬定州郡文武通差

十一月二十三日詔今後郡守宮觀人並許先次解任依舊以次官攝如任滿得替即須伺候替人交割方得離任。十二月二十五日臣僚言奉旨右宣教郎通判靜江府鮑同差知高州乃知靜江府張維所薦守臣不當薦通判非堂除不當知高州欲望寢罷從朝廷選除從之。閏五月八日臣僚言見任守臣凡年七十以上者乞詔大臣檢舉例與宮觀自今後除授考其政績叅以（應）履方許擢用從之。八月十四日詔今後監司郡守凡按發之際先委清強忠厚之士體究得實方聞於朝從吏部侍郎江大猷請也。八年三月十一日吏部言荆湖北路安撫轉運提刑提舉常平茶鹽司奏欲乞

將常德府守臣帶提舉鼎澧辰沅靖州兵馬盜賊公事

委事利便本部欲依逐司所申事理施行 十二月十

三日戶部尚書楊俊言契勘諸路額發經總制錢每年

常是虧欠照得今年八月四日指揮止令通判拘催專

任賞罰切恐與守臣異同不肯協力欲乞依乾道二年

十二月五日指揮令知通同共任責協力拘催分受賞

罰庶幾不悞本部歲計從之 九年六月八日詔諸路

監司郡守不得非法聚歛並緣申請妄進羨餘違者重

寘於罪令御史臺常切覺察彈奏 八月十四日臣僚

言凡州縣令輒因公事敢科罰百姓錢物者許諸色

人越訴坐以私罪仍乞放罷人吏決配贓入已者官吏

送監司根勘以聞監司察州郡州郡察縣鎮監司不能
覺察御史臺彈奏若因事發覺監司守臣並一等罪從
之

宋會要

淳熙元年三月五日樞密院言差文武臣知州郡浙東
路明州江東路池州江西路江州興國軍福建路漳州
興化軍湖南路郴州全州桂陽軍湖北路常德府澧沅
靖州信陽軍辰州德安府廣東路惠州德慶府廣西路
靜江府融高雷鬱林瓊州昌化吉陽軍淮東路真楚通
泰滁州高郵盱眙軍淮西路舒和光濠州無為安豐軍
京西路隨郢州光化軍成都府路簡雅茂威州石泉永
康軍利州路興元府洋興成鳳州大安軍夔州路夔達
施州南平南安軍潼川府路遂寧府瀘叙州長寧廣平
軍 專差武臣知州郡廣南西路邕賓橫叙康宜州萬

安軍利州路文階西和州夔州路黔州

四月六日黎

州知州依成茂州例差武臣從知成都府薛良朋請也

五月二十五日詔諸州軍守臣罷黜指揮到日即將

州印交與以次官不得匿旨逗留如違仰監司及御史

臺覺察聞奏

十二月八日詔滁州到任任滿依廬楚

州推賞

二年二月八日詔吏部見擬注知州軍令盡

歸堂除使闕

六月九日中書門下省言武臣橫行正

任或大小使臣差充知州從來未有稱呼定制自今正

任觀察使以上差充知州府並為知某州府通侍大夫

至右武大夫差充知州為充某州若係合差待制以上

人去處為權知武功至武翼大夫帶遥郡差充知州為

權知州某若係合差待制以上人去處即為權發遣武功大夫至小使臣差充知州府並為權發遣正任觀察使以上差知帥府為兼某路安撫使餘州帶管內安撫者為兼管內安撫使通侍大夫以下差知帥府帶兼主管某路安撫司公事餘州帶管內安撫者為兼管內安撫司公事從之 十月十八日詔西和階成鳳州守臣依舊以充制官兼 十一月四日詔自今黎州守臣今制置提刑司公共於文武臣內通行選差公廉有材力人申取朝廷指揮 六年六月詔今制置茶馬提刑三司公共奏辟以四川茶馬吳摠言黎州買馬全在守臣得人本司不預難以任責故也 二十三日詔應赴任

半年前奏事別與差遣人知州資序添差叅議官通判以下資序並添差通判其初授訖朝辭人亦依逐項資格與正關叅議通判差遣先是新知潯州曹朴上殿上以其不堪作郡又不欲使待遠闕宣諭宰執令與添差龔茂良訖分作兩等以處之故有是命 三年三月二日詔四川都統制吳玠選習兵官一員兼知文州以四川制置使范成大言文州管下蕃部作過知州李彥堅畏懦失職下任王彪老謬不肯之官彥堅彪既罷因有是命 四月三日詔侍從臺練兩省官照資序差格不以外雜舉監司郡守歲各五人保舉官及五員以上列銜共奏明言所舉人有何政績才術堪任何等監司

帥府大小州郡差遣聽上半年奏舉中書省置籍三省更加考察取旨除授 六月二十一日詔真州通判通徐棟知泰州中書門下有言已降指揮第二任通判以上資序人不以內外與知州軍差遣棟雖係初任通判資序因監司以勞効實跡薦舉與陞擢差遣難以一槩施行故有是命仍令自今後有似此之人依此 八月十二日詔富順大寧知監自今堂除潼川路轉運司申定差朝散大夫楊騫知富順監吏部檢準淳熙二年二月八日勅行在職事官諸路監司知州軍依舊堂除內不曾該載知監案闕詔楊騫依轉運司定差因有命十一月二十三日詔諸州軍守臣惟才是用自今不

拘遠近於文武臣內選擇差除 四年四月十六日詔
諸州軍差武臣去處須精加選擇可以治郡者閤門宣
贊舍人應材言今日武階通差守臣然而郡寄重甚非
便民事者彊使為之必不勝任故有是詔 七月二十
五日詔職事官未至知州資序人陳乞外人緣堂除并
取到部開通判皆遠如係通判資序可特與添差參議
官一次知縣次序以上與添差通判一次在職改官後
及二月同每路每州各不得過一員候添差及兩政之
後別取首先是二年定職事官除郡之格理親民資序
後以實歷職事官年月等第除授於是翰林學士知制
誥周必大等言乾道中書門下令諸在京職事官未至

監察御史已上履歷尚淺供職未久陳乞外任者不得除監司知州軍差遣注特旨除授或資序已及者非今乃許其身內改秩或京官不曾作縣統歷職事官三二年便得為郡間有辛勤州縣歷數任必參格法方始得之若何而不內重外輕乎乞自今職事官未至監察御史以上者履歷尚淺供職未久陳乞外任欲乞依乾道中書門下令不得除監司知州軍差遣其有材能勞效卓然顯著特旨陞擢者不拘此限其元係部關州軍并川廣州軍令三省選定緊望去處合堂差外並發下吏部依格法注擬元係堂除通判閤依舊歸堂所立定格即非舊法合行除去並依舊法從之其吏部注擬知

州軍并堂除通判員闕並遵依紹興五年閏二月十三日措置指揮 五年六月二十七日詔吏部注授知州軍人並令赴都堂審察訖前去之任候任滿日奏事

六年八月二十三日詔鬱林州守臣可令樞密院選差武臣一次 八年三月二十八日詔帥府并駐大軍州軍守臣自不合除代外自今每路各留兩闕候見任人去替半年方許差人三省常切遵守以侍御史黃洽言今州郡大率皆四年闕職事官之久次者豈不欲更迭補外大抵食貧無以為遠次之資是以盤旋而不能去議者無以處之遂又有添差參議通判之說州郡既以闕乏而創為添差不已夫豈良策宜於州郡闕中留十

數闕不差替人以俟後來擢用之人故有是詔 九年
正月三日詔諸路守臣任滿開具本州實在財賦數目
及有無拖欠諸色請結并有無欠人戶錢物不管以
在庫虛數及不係合本州合用之數在內具公文交割
與交代如正官未到並以交割以次官及其一般文狀
省部置籍稽考如有不實許監司臺諫覺察奏聞 總
領及轉運司依此施行十一年六月令戶部檢坐申嚴
仍仰新到任人限一月內將交割到數目從實具申如
違許本州部具名奏聞 七月十六日詔自今黎州守
臣衙內帶兼節制黎雅州屯戍軍馬以四川制置使陳
峴言雅州榮經縣并碉門寨等處與黎州相關所管戍

兵止是知縣知寨官主管或有小驚分布防拓須聽黎
州守臣號令方能相應故有是命 十一月六日詔汀
州守臣依舊堂除 十二年十一月十一日權戶部侍
郎葉翥言乞令守臣得替開具合起歲額諸色窠名錢
物有無發足與虧欠及許其自言在任之日或能關防
滲漏掇節妄費趙積儲蓄以為一州後日計者申尚書
省下戶部以憑審實從之 十三年二月十三日進呈
知州軍留闕闕江令中書置簿籍定遵守先是上諭宰執
州郡不須待闕人多可大郡小郡各留幾處勿除代於
是所留凡四十二州浙東路紹興府明婺處州浙西路
臨安鎮江平江府湖州江東路建康寧國府太平州廣

德軍江西路隆興府贛吉州臨江南安軍福建路福州
建寧府泉州汀州湖南路潭郴州武岡軍湖北路江陵府
鄂州荊門信陽軍淮東路揚楚州盱眙軍淮西路廬和
州無為軍京西東襄陽府光化軍廣東路廣州肇慶府
潮州廣西路靜江府邕瓊州 十月二十七日詔今後
四川二廣知州軍見居川廣合關到半年前奏事人及
係見關去處並令詣本路轉運司稟事仰漕臣精加銓
量人材委堪任使非昏謬老疾之人結罪保明申尚書
省以上孝宗會要 淳熙十六年十一月十四日詔知
閬州吳昭夫知果州趙譽各特轉一官與近關蜀師差
遣以四川總領趙彥適言措置有方催科不擾故也

十七日宰執進呈盱眙守臣霍虎捕獲趙興等透漏銀兩甚多不可不畧與旗賞上曰與轉一秩以為沿邊官吏舉職者之勸 紹熙元年三月二十四日詔漳州觀察使知揚州鄭興裔除保靜軍承宣使以興裔久任邊帥職事修舉故也 六月十九日臣僚言應郡守有賊汙狼籍曾經論列或被按劾而事跡昭著者任祠祿之後乞不得復任郡守從之 二年三月二十三日中書門下後省言看詳吏部尚書鄭興裔奏乞自今到部初任用賞改官人須實歷三任方許注知州軍閫自餘悉如見行條法庶幾用舉主陞改人資歷稍同實為允當從之 四年十二月十一日中書門下省言今沿邊州郡

嘉穀誤

所除太守皆用二年承替與內郡無異送往迎來初無
固守之計今欲將極邊楚州盱眙軍滁州豪州安豐軍
光州隨州鄆州光化軍均州信陽軍金州洋州鳳州西
和州成州階州次邊高郵軍和州無為軍德安府復州
荊門軍二十三郡今後遇有闕到半年三省樞密院同
共商議於文武臣精加選擇並令三年為任每遇任滿
如有治効取旨陞擢特令再任見在任及已差下人並
成資滿罷從之以上光宗會要紹熙五年十月四日臣
僚言朝臣廷舉四蜀之地付之制司其權不輕其責甚
重則凡一切之事宜皆歸之制司而州軍守臣赴上之
銓量反歸之四路之漕司夫漕司之權比制司為輕而

漕司之責亦不如置司之重權輕則不敢多有所廢黜
責輕則不暇詳於顧計其間雖特立獨覓不溺此習之
人然亦無幾今不若以銓量守臣之柄一付之制司夫
權重則雖廢黜之多而有所不憚責重則顧計利害之
深而不敢苟且如此則昏耄疾病不勝任之人不得以
冒居守臣之任而州郡無不治矣從之 閏十月十日
敕令所言今以紹興參附尚書司勳格紹熙五年七月
九日聖旨擬修下條郢州州縣官格右到任及一年減
一年磨勘任滿更減二年磨勘右入淳熙京西路酬賞
法從之先是權發遣郢州任世安言京西一路六郡之
地與敵境相接除襄陽府均隨房州光化軍五郡官吏

任滿皆有恩賞獨郢州無推賞之令如房州一郡居大山之中地勢深固去遠稍遠尚蒙朝廷存念官吏任滿亦與推賞而郢州極^遠照別次邇體例特與放行恩賞庶幾官吏趨赴事功自然有所激勵至是勅局修立為法也 慶元元年二月一日詔處台衢秀嚴信池筠袁撫江泉漳潮通泰鄂永邵州南康軍二十闕今後止差一政令中書籍記非職事官補外不許陳乞 六日詔南安邵武漢陽知軍三闕依舊堂除 七月二十三日詔曰朕圖回初政不遑康寧延見群臣時詢治道有可採用未嘗不行比覽奏對所陳多以監司郡守數易為說蓋監司典一道按廉之權郡守膺千里牧養之寄竟

不久任獎非一端雖得賢能之人要必假以歲月豈有
閱日尚淺又復徙而之他居官者懷苟且之心競進者
亡久留之意民知其將去則莫從化更知其可欺則絕
簿書若乃財用殫于送迎卒徒疲于道路郡縣凋弊殆
不能支此誠今日所宜首革者也朕既明諭大臣遴選
人材于除用之初矣繼自今深鑒前弊無數變易以考
治功以寬民力其有績效著聞者當以璽書勉厲增秩
賜金公卿有關選諸所表以次用之庶幾乎漢宣中興
之治顧不美與刺史二千石其各安乃職共乃事務為
悠久之計政成而侯襲擢稱朕意焉 十月三日詔通
判資序及兩經任通判人方許除知州庶幾士夫不為

空言究心民事以副朕愛養元元之意如有卓異之才
宰執將上取旨別議旌擢雖有已降指揮者更不施行
十一月三日右正言劉德秀言國家在外之選莫重
於監司郡守然監則多出於一時之差擇初不膠於一
定之法若州郡守臣則似膠於法而不通矣不有以通
之其可哉且今天下幾郡為郡守者幾人或已居官或
未赴上姑以十分為率其三則為朝廷補外之人其七
則由小官積累以至者也其由朝廷補外者則以才望
選而由小官以至者特以資歷耳今小官之入仕或早
或晚是雖不一姑酌其中而言且以三十而仕守闕歷
任必須七八年有舉主三人而後得所謂闕陞者又守

關歷任六七年求舉主五人而得所謂改官者則蓋幾
五十年矣既已改官然後作縣謂之湏入而縣關之佳
者至三年其次者亦不下二年其守關歷任又如前比
迨作縣之竟則已五十餘矣然後入所謂屬官通判展
轉兩任共湏十年然後始可望四年五年之郡則幾於
七十矣當此之時筋力疲於少年之奔走精神困於少
年之酬應雖有趙廣漠之聰明桑洪羊之心計謾不復
知省矣其權不過委之於僚吏否則一歸之吏胥之手
而已百姓何由而蒙利哉臣愚以為今不若擇天下之
劇縣若干類而榜之使改官湏入之人其居是官有撫
字催科兩課俱優發摘教化並行不悖者令州縣監司

以其治狀結罪保明來上仍令御史臺覆覈如委有顯迹則稍超躡之畀以見近闕通判任滿即與知州軍差遣如此則其人幸筋力之未衰精神之未耗展布四體以惠利斯民一利也為劇縣者既前知有州壘超躡之可慕則悉心畢力趣事赴功而縣無不治民無不被其惠二利也舉一事而二利從亦通變而適時之法然或者謂近降指揮須兩任通判然後可以得郡無乃與之相背也臣以不為然近降指揮為中常之才設也初不相妨亦可兼用如陛下以臣言可采乞降付三省詳酌施行從之二十四日臣僚言孝宗皇帝朝詔守臣到任五年以民間利害五事上聞年來殆成文具臣謂莫

若不必限以五事但使之講究利害委有關係生民休戚者然後使之上聞少者或以一二多者或過於五事如可備採擇乞頒諸州奉行從之 十二月二十一日宰執進呈中書舍人汪義端劄子乞邊地帥守雜用文武之臣若文臣知州亦宜選武臣為貳其文臣倖貳之無用者自可省去上曰郡有倖貳正_如諸軍統制之有副也互相糾察豈容省去此論是余端禮等奏聖訓切當兼改更祖宗法度亦非所宜 二年九月二十七日臣僚言監司帥守陛下所賴以風厲一道而表率郡邑也今於迎送之間一切踰法過度既破兵衛之給又邀舟楫之用名為水脚且水則具舟楫陸則具輿馬所出

各不過一塗所蒞亦各有定數灼然不可欺也而剖符持節以出既多為之程又兼取夫水陸之費方來則文移正索以為當然既去則自為囊索取又數倍監司取之於列郡郡首取之於列邑郡縣匱乏何所從出不過為一切之政以供之幸而終更者二年一取已不勝擾其或數去數易將何以堪今宜立為之法使舟行者鑄其兵衛陸行者禁其水肱或貪冒無恥兩有所取者一以贓論迎送之兵多寡遠近並以成法申嚴行下庶幾稍知自律足以表率郡縣之小吏從之 三年四月三日臣僚言仰惟孝宗皇帝長轡遠馭凡兩淮荆襄沿邊州郡必斷自聖意精加採擇猶慮未能盡得其人嘗詔

從臣臺諫各舉所知以充其任一時應選皆是綿歷州縣深達事機熟諳民務才能之傑然者間用武臣亦必其儕輩中之素所推服而更練不在文臣之下者近年以來除授寢輕往往躡分而求循例而請夤緣交結志在苟得乞自今兩淮荆襄州郡及金澤等處守臣不許妄有陳乞其有資歷稍深舊例可得而才能不堪邊寄者且與外任兵官差遣或川廣遠近庶幾控扼形勢要害之地舉得其人可以上寬憂顧詔從之仍常切遵守

五月二十四日詔嘉興府處台衙嚴信池袁撫江潮漳泰溫徽州通增作十五闕專充職事官補外其已籍定邊郡如遇有闕亦許通差以三省言昨來所留三十

闕內常留見近十闕以待職官補外緣十闕大窄故有是命 四年正月二十二日右正言劉三傑言乞今後監司郡守應以疾患控列別無規避者即與將上取旨畀之祠祿以均閑佚其抱病日久不以自陳致有廢事者郡守則令監司覺察監司則令諸司互察便賜罷斥或有隱蔽而不以聞者則令御史臺劾奏亦與黜責庶幾各知廉恥不敢養病以負朝廷之隆委從之 四月二十九日臣僚言伏見二廣州郡有自來係吏部依格法差注去處因慶元二年臣僚有請乃降指揮盡作堂除緣此有資歷深多者既不得受有孤寒恬退者又不容受反使能官安分之人未免滯淹其躁進巧圖者躐

次越等妄行陳乞徒長奔競愈不足以重遠方牧守之
寄詔從之其廣東路英德府南恩循梅封新州廣西路
潯高藤昭象梧貴化鬱林州昌化吉陽萬安軍守臣關
並發歸吏部照舊來格發差注所有在堂二廣州軍關
如武臣陳乞亦須曾歷民事熟於州縣者方得進擬
五月二十一日詔今後京官補授雖已任通判得替未
曾作邑人須通歷兩任通判終滿方得與除州郡差遣
十一月二十七日臣僚言比年以來歲使監司定臧
否之論而朝廷行黜陟之權法信美矣唯是人心不同
真偽難辯或有違法以干譽設詐以盜名巧為營求冒
干臧最而政未必平訟未必理田里之愁歎莫之卹乞

降監司於考察郡首之際其實惠及民者則以為臧而
虛聲罔民者即以為否庶幾欺偽不行為郡首者各圖
惠民之實以副陛下保民如赤子之意之從之 五年

六月二十六日臣僚言竊見近降指揮凡守臣引年謝
事之人例與宮觀候替人交割錢物訖方得離任朝廷
之意正恐錢物易以侵欺兼又干求請囑乘間而去旬
月之內咈人任怨既不可為則未免徇私曲從寧無害
事反使其人愈不自安乞令已得宮觀人徑將錢物交
付以次官一面離任如以次官妄有支動許新人點檢
具申朝廷請旨施行仍令監司覺察從之 十月二日
臣僚言比年臣僚有請累降指揮應監司守臣改差替

罷具見管交割錢物數中省部此誠良法美意天下遵承無敢違戾大抵錢物有經常有餘羨有支用有起解有椿積有增有虧要當分別窠名使各歸著之行下諸路諸州今後交割錢物各開數目窠名某錢某物今後椿管某錢某物合充支遣某錢某物合行起綱供申省部交與後官其見管錢物內有無合起綱運合支用庶諸使路諸州財賦所在本末源流各隨其實一歸聖朝責實之公而無昔人偽增之弊從之 嘉泰元年三月二十三日右諫議大夫程松言乞明詔大臣其於武臣知州蓋無選擇曾任閭閻已經擢用之人亦須察其慈祥愷悌留意民事至於絲常調而序進者更宜畧效

丈臣限以考任及曾任縣令委有政績然後付之郡寄
應州郡通差武臣去處仍乞妙選才幹之吏以為倅貳
庶幾相與協濟詢究民瘼檢掇吏姦下為千里之體而
上副九重共理之切從之 四月二十九日詔今後四
川守臣闕到合赴上之人銓量得雖川臣昏耄疾病而
才力實不逮者並令制置司從實保明別與宮觀閑慢
差遣 二年二月二十七日詔今後曾經作縣又經通
判任滿之人到堂且與川廣小郡如任通判不曾作縣
合再與通判差遣 四月十七日臣僚言乞照慶元三
年指揮止乞酌中存嘉興府處台衛嚴信池袁撫江潮
漳泰溫徽州共十五闕令中書再行注籍專待職事官

補外並止差一政日後更不借用仍乞照已降指揮邊
郡有闕亦許通差其餘諸州有元係留闕今次再行存
留留剩下之數並以待外方合得州郡者與其他諸州
軍府哀同使闕庶幾外方求郡者有闕可入不敢更有
睥睨留闕而朝士之出外者亦得近闕以行不至有先
乞占闕之蔽從之 三年十二月二日右諫議大夫張
澤言當今急莫先於邊備之策莫急於選擇帥守乞詔
二三大臣留意邊郡帥守將背公徇私不能為國遠慮
之人易而去之除授之際公共相度精加選揀必求彊
敏通練能為國遠慮者用之俟在任果有政績則增秩
賜金俾之久任以示褒庶使有志事功之人咸知激昂

奮勵從之 四年六月二十一日臣僚言監司守臣多
不以實選選人改官僅了作縣一任通判即授知州雖
望郡大藩率可坐致如執券取償所至害民罕有善政
向因臣僚論建寧降兩任倖貳方許作郡指揮謂宜申
嚴必行以重民社之寄乞今後通判兩任方許除授知
州除廣郡外欲乞四川亦照此施行如正術才望公論
共推者即係朝廷擢用詔除成都潼川遂寧興元府瀘
興夔州外其餘州軍今後上州差曾任知州一任以上
人中等州差兩任通判人下等州差一任通判任 開
禧元年三月二十五日臣僚言臣聞郡縣天下之根本
也郡守天下之司命也今為郡守者其視往昔何如哉

通判善罷不用爲舉取一陣如探懷袖至於一任知縣
一任屬官不歷半刺亦得以竊專城之寄不亦太輕且
濫乎其間有罪戾罷斥之餘黃緣祠祿不俟滿歲即謀
干請郡堂之審察御史臺之參辭閣門之見謝皆所以
察其人而審其實著之令甲豈容輕廢今在外得郡之
人始焉既無堂審臺參陞辭之禮戍期甫及又黃緣獲
任滿奏事之命自始至末九重不知其人廟堂臺諫不
識其面雖瘡老疾病關冗猥瑣皆得掩覆其迹若人而
居千里之上豈不重爲民害乎今郡守之闕近者兩政
遠者數年朝路壅塞不通廟堂除授不行職此之由乞
詔有司申覈實之政重牧守之寄除曾經擢用有朝蹟

已經奏對及湖廣四川沿邊員闕辟置外其他除郡雖知州以上資序並須親到闕方許除授如合奏事之任入已對在四年外者不許巧作規避庶幾賢否別而俾門塞牧守賢而國本固從之 嘉定元年六月十八日臣僚言息兵修好既通信使將撤戍軍經理邊陲最為急務然而蹂踐之後農桑一空室廬不存赤地彌望流民歸業生計茫然各欲使之安存其策未知所出朝廷用人往往拘於資格之相當局於履歷之相稱間欲拔擢而用之或牽於人情而聽其自擇或懼其創例而來者不已是以經束拘攣用者未必能能者未必用當安平無事之日猶可固執資序至於拯溺救焚之時其

可不思所以更之哉乞令侍從兩省臺諫各舉邊郡太守二三人俟姓名來上次第分遣仍乞久其資任寬其文法課其勞績第其優劣或增秩賜金或褒詔除職舉得其當者受工賞薦非其人者被顯罰如此則不出十年兩淮荆襄全蜀皆復承平全盛之舊矣從之 八月十三日御史中丞章良能言今之急務莫如經理兩淮今守臣多出臣僚薦舉或朝廷遴選事體至重自合專以功名為念若假此以為進身之計到任未久又求遷擢則萬事無可為者乞兩淮守臣並以三年為任任未滿間不得陳乞宮觀如有罪狀顯著嚴行責降不特放罷而已若功效尤異即用增秩賜金之規或有加職名

以示褒賞其未滿三年別有移易許給舍臺諫論奏其
荆襄間亦乞一例施行從之 二年二月十一日詔雅
州守臣任滿與減二年磨勘令勅令所修立成法以四
川制置司言雅州守_臣職責任非輕考之地理正係邊面
乞比附黎州賞典故有是命 五年二月一日臣僚言
先朝舊制文武_臣皆以磨勘遷轉文臣自選人至京朝
官止以考第_{考第}察之者詳且密矣仁宗皇帝以改官猥衆
於是始立舉員之制而武臣則仍其舊方是時武臣之
登用者少而入仕之途未加多也今武臣為郡視為常
典而廉行能否莫之保任是不可斟酌其法而損益之
乎且文臣必三考有舉主而後闕陞又三考有舉主而

後為縣縣滿三考然後為倅倅滿為郡其歷民事差久而保任薦揚之者七八人焉然其間猶有貪鄙狼藉者有昏謬不解事者今武臣或便從軍或為計議漫不省民事之謂何乃遽為郡安有高材異能不待嘗試如彼其易哉乞自今後武舉人所官須歷巡尉次任須歷諸州都監又次任使歷知縣無過犯有舉主方可與郡庶使習熟民事宅生重寄皆得循良諳練之士而文臣武臣之得郡守者不為偏矣之說六月一日監察御史石崇萬言作邑任滿人許授通判此固舊制也臣竊見近降指揮帥府大藩如臨安紹興平江慶元府等闕並差經任通判人其次名郡如胡秀衡娶太平建寧等闕並差

作邑有政績人如經任通判人願受者聽其他如常嚴
饒信等闕並差應入通判人如作邑有政績人願受者
聽如是資歷淺深粗有以甄別今也不然一經作邑曾
預論薦即起院轄之望僅俸終滿初無聲稱即乞大郡
通判豈不陵躐夫一任通判人許授川廣州軍此固舊
法也臣竊見續降指揮兩浙江淮湖南北京西州郡除
帥藩外並差兩任通判以上人四川州郡分為三等上
等州如崇慶眉漢嘉定之類差曾任知州一任人中等
州如黎雅隆叙重慶之類並差兩任通判人下等州如
威茂石泉長寧之類方許差一任通判人如是則其選
稍艱不至冒濫今也不然一經作倅不量資格便欲覲

望近襄州郡豈不超越乞自今除授守倅並照已降指
揮如京官出身有恩例免作邑人須實歷八考方許授
小郡通判其已曾經任通判人當先考其前任履歷更
審觀人才可以作郡然後畀之庶幾稍革奔競僥倖之
風從之 二十三日國子博士徐自明言臣觀內外州
郡每闕一帥臣守臣陛下必為之精擇遴選或有躊躇
數月而不輕授者若乃績用無聞僥倖滿秩或與一蜀
郡或與一廣郡則諉曰是資格之不得不與者也是險
僻瘴癘之鄉人所不樂去者也夫蜀郡廣郡非陛下之
土地人民乎至使昏謬闇茸者得之貪冒無恥者得之
其不病民者鮮矣至於每歲用改官人而俾之試縣雖

未必盡皆得人猶曰用薦舉五劑而後得之也而縣令之職無郡不有今選人之能奮勵以自媒其身者不授諸司幹官則授州縣幕職官去矣其俛首而受令者非庸繆昏虐徒否則罪戾之餘而已吏部亦不復與之較曰是財賦之難辦民訟之難決督責多而勞績少非人之所樂為者也如是則又安保其不為民病乎夫地遠帝畿則貪虐易以下及病苦艱於上訴職近親民賢而惠易以孚不賢則虐易以肆是誠不可不深念毋以其遠且小而忽之也臣願川廣諸郡非作倅實有勞績曾為監司所舉者不可以輕授而畀之郡者必令奉事之官因以問其所言考察所行以周知其能否其昏虐而

閩茸者宜止與之帥府參謀及大郡倖貳至於諸邑之
令非嘗有一二舉劄而無過犯者不可輕與仍令監司
謹擇其憂民稱職者先有所舉薦以為作邑者之勸從
之 八年七月十一日知贛州楊長孺奏汀贛聯境民
習兇頑不務農桑易於為盜近年贛盜頗稀汀盜反為
贛害蓋贛人有犯追捕甚嚴人知懲艾惟汀州隸福建
汀人為盜於贛贛州移文追捕而汀州視如秦越緣此
數載汀盜公行此而不防久將益熾勢須江西守臣得
以兼福建之兵權庶幾福建盜賊江西可以討捕竊見
本州兼領兵甲越至廣界南雄南安悉在鈐制故江西
交廣事體相關應授如響廣東之盜不敢侵踰其效可

覩獨汀州之盜頻來擾害捕則竄歸歆乞將汀州兵甲
照南雄州例許本州守臣提舉添入汀州兩字繫銜仍
劄下福建路安撫提刑司及汀州照應施行庶幾彼此
相維群盜可弭又照得贛州瑞金縣正汀盜出入之衝
而古州古城寨最近瑞金若蒙朝廷以古城寨為兩州
界寨使本州與汀州皆得統轄則汀盜有所畏憚矣從
之 九年十二月十七日詔天水軍移就天水縣舊治
其知軍令四川制置司選辟文臣一次 十年八月一
日四川安撫制置使司奏據新知天水軍黃芟孫申乞
照光化軍與龍州體例兼帶彈壓屯戍軍馬本司照得
天水軍正係極邊去處又有出戍官兵若使守臣與之

通判諸州府軍監

全無關涉竊恐緩急誤事黃炎孫所陳委為允當乞檢
照龍州體例自後天水知事兼帶彈壓屯戍軍馬繫銜
從之已上寧通判諸州府軍監 宋置諸州通判各一
員西京南京天雄成德孟州并鄆荆南潭廣秦定等州
各兩員小郡或不置正刺史以上及諸司使副使知州
者雖小郡亦特置兼管內勸農使 太祖建隆四年四
月命刑部郎中賈琬等充荆南道諸州通判十一月詔
應諸道州府公事並須長吏通判簽議連書方得行下
開寶四年四月詔廣南管內州郡除已差朝臣知州
外其餘見闕知州通判處委吏部銓於鄧唐隨郢襄均
房復安中等州并荆湖管內見任令錄兩考已上成資

者及判司簿尉中兩任五考合入令錄年五十五以下者移注仍別降敕兼令知州許般家赴任緣路支給館券其俸錢並依逐州錄事參軍例據戶口特支見錢以三考為限秩滿不令守選據資敘量試書判注在北幕職官七年五月詔諸道州府通判官等每有公筵並接知州坐次 太宗太平興國五年七月命知萊州殿中丞鄭濟文知單州左贊善大夫劉厚德並通判本州事以刺史赴本任故也 雍熙二年二月以著作郎韋臺通判隨州殿中侍御史李式通判道州武光穎通判博州 初李繼捧歸朝其弟繼遷遁入蕃部為寇會邊臣言繼遷悉知朝廷事蓋繼宜捧等漏露故宗族悉置於

外令置等通判專司郡政 真宗咸平四年正月省杭州通判一員 景德二年六月置濱州通判一員以刺史周緒赴本任也 真宗以武臣多不閑政理非通判廉幹則民受弊詔應防閔刺史在本任及知州處見任通判令轉運司密具能否以聞 八月八日河北轉運使劉綜請擇文學器識之士通判緣邊州軍庶其商度邊事往還北境文牒從之 三年十月置解州通判官一員舊制州不及萬戶不置通判至是解州及數乃置 四年十一月詔保州通判自今選進士登科有材幹者充保州密通邊境舊止武臣知州每契丹官屬書門及行移文牒多未適中故令選任 大中祥符二年十

二月詔緣邊并連接溪洞州軍其間通判職位高於知州者並勘會移易 四年八月詔武臣新罷軍職正授郡任者各選差通判官 六年正月上封者言武臣知州軍處或闕通判望令轉運司飛奏以聞付有司速差所差官如未到任仍於京朝官知州通判有全員處權差從之 天禧四年七月置懷州衛州通判各一員以轉運使言二州頻年災傷今民稍復業請增官綏撫故也 乾興元年仁宗即位未改元五月置戎州瀘州通判各一員從安撫使江德源請也 天聖元年三月甲書門下言應北朝人使經過州郡通判今後令審官院選差從之 二年四月集賢校理葛昂張仲尹黃弼陳商范

說等言各乞外任差遣詔並與小處通判 太宗朝凡
帶館職出皆知州景德後並與並以官卑止與通判因
以為例 三年五月二十八日中書門下言新授虢州
團練使田敏差知隰州自來防團刺史赴本任又知州
無通判處權置同判候差朝廷及內職知州即却省罷
詔隰州權置同判 五年八月置祁州通判一員先歆
增置詔轉運司相度乃言本州領三縣戶口為三千民
事稅賦不少止以武臣知州況係緣邊實稍要差置故
從之 六年正月上封者言京朝官兩任知縣入通判
欲望今後並須三任方得差克如有殊常勞績及奏舉
人數多者令審官院別取旨從之 六月詔廣州權置

通判一員舊無通判至是轉運司言近以武臣石晉知
州本州錢穀刑獄事繁乃增置 七年三月二十五日
詔潭州同判官自今增置一員從太常少卿李若谷請
也 七月詔自河北河東陝西緣邊同判並於第二任
近地知縣內到任及二年已上者就移候得替別充三
任同判方入知州 九年九月詔沿邊四權揚州軍自
今同判選經歷任有心力清幹京朝官充 是月河北
轉運司請置順安軍通判一員從之 寶元二年正月
詔陝西秦鳳鄜延涇源等州鎮戍軍及河北鎮定瀛莫
雄霸等州通判自今令審官院並選差人 五月增置
永興軍延州通判各一員 康定元年六月十六日河

東轉運使文彥博言河東隰州寧化保德苛嵐火山
軍處地居邊境自來止有職官元無通判乞各差京朝
官一員充通判却省職官一員詔審官院選曾經知縣
一任者充見任職官候候資放放便許叅選 十二月
二十四日詔增施州通判一員以京朝官充仍於本路
縣令內選舉從本路轉運司之請 皇祐三年二月審
官院言通判員多闕少今定藩府州軍凡五十一處請
各差京朝官一員為簽判及端符等二十二州邕桂宜
三州通判舊制就移知縣入充今請先問從之 五年
閏七月二十六日詔今後曾任中書樞密院臣僚出知
外郡更不得奏辟通判許添奏職官一員餘依前後條

賁 嘉祐二年正月九日右諫議大夫知桂州張子憲
言乞差前知貴州周約克本州通判非常例也詔以桂
州一路安撫使自今聽舉通判一員 十月二十二日
審官院言劾會西京北京益州廣州荆南并州江寧府
杭州永興軍鎮定秦延渭慶鄆青州並是京府及安撫
使都鈐轄分領州鎮其差通判欲今後並以知州資序
人差克任滿無公私過犯候到院與陞半年名次從之
時以在院知州員多故有是請 哲宗正史職官志通
判掌伴貳郡政凡兵民錢穀戶口賦役獄訟聽斷之事
可否裁決與守臣通簽書施行所部官有善否及職事
修廢得刺舉以聞 神宗熙寧元年正月二十三日詔

諸州通判通點檢本部巡檢器甲具堪任披帶行使以
聞仰本路提運提點刑獄兵甲司每歲舉行仍自今器
甲損壞只送本轄州軍納換 四年十一月十七日詔
自今近臣因老疾得知州軍者其通判並擇時天章閣
制待知單州孫思恭以疾乞任許之因有是詔 五年
十月詔編定鎮戎保安通遠軍通判吉鄉軍使並令中
書選差 十一月十九日詔熙州置通判二員曹官三
員 七年四月二十一日詔諸州軍器物料並置庫選
職事或曹官一員兼監仍委通判點檢 元豐元年五
月七日提舉茶場司言彭漢通判許本司權奏辟如能
協力保明留任從之 三年十一月三十日詔諸路監

司具到部下通判治狀最優有未經朝廷任使者令中
書籍其姓名 六年二月二十五日詔陝西路帥臣所
在通判不許監司差出從知慶州趙鼎請也 四月二
十六日陝西轉運司乞就差通直郎通判解州吳安憲
通判延州詔沿邊軍民事之大者雖多屬經畧司處置
然干涉州務事亦不少須得明敏之人剴遣乃無敗事
魚即令本州內外興役修治城壘方賴以次官分頭幹
辦可依所奏速差 哲宗元祐元年十月四日詔內地
及川廣通判除堂除人外並以三十月為任 十一月
五日權發遣秦州兼管勾秦鳳經畧安撫都總管司范
育言知州係帥臣將下公事乞不許通判同管從之

十二月二十二日詔堂除通判成資為任 二年十月
八日詔賓橫州通判聽舉京朝官知縣資序已上人克
三年六月一日吏部言請川廣通判除有專法指定
及酬獎外不以見任新差官並二年為任其使闕替悉
依本法從之 九月十六日詔吏部擬注通判依知州
例赴門下省引驗 紹聖三年三月十六日京西路轉
運副使郭茂詢言西京係祖宗陵寢在所通判職任至
重請自朝廷除授從之 三年十二月十五日發運使
呂溫卿言乞真楚泗州通判請自朝廷選授從之 四
年正月二十五日杭州路轉運司言乞今後通判並許
羌州峽人從之 元符元年詔通判幕官令日赴長官

聽議事及都廳簽書文繳

徽宗崇寧三年二月二十

一日詔河北國信道通路經由州軍通判令吏部依格
選差申三省審察 政和元年六月二十日詔河北沿
邊次邊州軍全藉強幹材敏通判羅買軍儲營辦職事
自今差注並令三省審察不得容罷癯綿弱年高之人
三年閏四月十一日詔武臣知州處勿差宗室通判
十九日詔自今三省吏人出職不得同任一州守倅
六月九日湖南路安撫鈐轄司言武岡知軍見係武
臣若緩急出入須藉通判治理兼學事亦須常得有出
身通判管幹伏望復置通判一月從之 九月二十六
日欽州言遠小州軍係初任或第二任知縣人權入通

判兼無司錄去處係通判糾察六曹即未審合與不合
理作實歷親民詔應無司錄處通判並許理實親民
四年十月四日詔諸州通判有兩員處以一員堂除
五年四月十九日臣僚上言伏覩雄州每年北虜昇本
朝國信使副往還到州至白溝驛及次白溝界首交割
絹並是通判親臨職事實比他郡不同自來本州通判
亦有差出雖差官權代臨事不無減裂臣欲乞今後雄
州通判雖不拘常制亦不許差出從之 十月二十八
日吏部言武臣知州軍並皆邊遠其通判專差有出身
官致有闕官日久去處少有應格之人自合依元豐法
不限有無出身差注從之六年七月二十九日詔邊倖

多副貳武臣倚以文法訪聞或老疾輕易或全無風力
坐糜厚俸無補郡事今後並具名取旨差仍着為令
七年六月三日詔淮陽軍廣濟軍信陽軍高郵軍荆門
軍漢陽軍懷安軍郢武軍復州榮州雅州普州通判堂
除餘令吏部差人 宣和三年閏五月十九日訪聞
諸州軍通判員闕多是寄居待闕或他州官奔競請求
權攝窺圖利人漫不省事虛費祿廩今後通判闕差本
處以次官權仍止許收受本職供給等違者以違制論
六月八日詔諸州監香茶礬事並委通判處委錄
四年六月二十六日荆南府申明本府通判二員即未
審合與不合依舊制通簽六曹文字都省勘會昨因京

東路轉運司申請應天府少尹二員乞分治六曹事准
政和七年四月四日敕依本司所乞諸路兩員處依此
詔令通管府事諸路兩員處依此 七年正月十八日
中書省尚書省言諸州添差通判處遇知州替移及時
暫在假於條牌印與以次官而添差入官在正任通判
之上竊慮合將州事令正任人掌署緣未有明文詔令
尚書省立法 高宗建炎元年六月十四日詔諸州軍
有通判兩員去處減一員嘉祐以前員額依舊例 二
年三月十二日詔承務郎蔡聲通判任以麟州市戶居
民僧道樊恭等言聲靖康間為本州司錄撫恤軍民乞
留元見闕通判故有是命 三年九月十七日詔應廣

南東路監事並委通判專行務要客販通快仍常切鈐
東官司協力奉行如敢違戾並令按劾從戶部侍郎葉
紛請也 四年六月十一日臣寮言近日州縣自通判
職官以至監當各有添差官或以恩例授請私計陳乞
宗室特差其實本非為民歆乞罷除添差通判職官其
監當官如繁劇去處添差無過一員詔今後更不添差
通判職官 二十五日詔鎮江府特添置通判一員後
知府劉光世請也 十二月十五日詔監司郡守遵依
累降御筆指揮並三年為任今後通判准此 紹興元
年十月十九日知荆南軍府解潛言峽州地據川口最
為要衝自罷通判後來大段廢事歆乞復置本州通判

從之 二年三月十七日詔將淮南通判到任賞比附
建炎元年九月二十四日京畿已降指揮到任與轉一
官及一~~年~~別無事故替移保明申吏部給告者若一年
內替罷更不收使任滿無遺闕更轉一官 七月五日
詔高麗人使經由州軍通判依舊堂除 三年正月十
八日詔今後淮南通判並令朝廷選差以中書門下省
言前降指揮令諸鎮奏辟朝廷審量除授以致闕官故
也 四月二十三日今後應遣發大兵所至州縣並專
責通判充錢糧官於界首伺候應副支遣俟人馬出州
界方得歸州 五月十一日詔令吏部契勘有無知州
所辟通判以聞以監察御史鄭作肅言近日即臣稍奏

辟通判切恐循習不已欲乞降詔檢會應諸州通判係
見在知州所辟者並令罷任今後毋得奏辟故有是詔
十一月十九日詔今後諸路州軍遇遣發軍馬並仰
本州將不係軍馬經由縣分錢糧通融移用應副仍依
已降指揮專責通判克錢糧官於界首伺候應副支遣
及令所委通判常切點檢覺察 四年十月十二日詔
右軍教郎濠州通判國鳳卿依舊還任主管職事先是
臣僚言淮南州軍通判可併有旨舒濠州通判並罷具
國鳳卿已罷宣撫使劉光世契勘濠州係瀕淮南與僞
界接境正南控扼去處故有是命 五年三月九日三
省言帥府通判今置兩員或有一員去處致帥司逐旋

申請添置除潭廣洪州鎮江建康成都府係見兩員外
詔帥府通判今後並以兩員為額 六年三月二十三
日詔舒州許復置通判一員從提點淮南兩路公事張
成憲請也 九月十二日知平江府章誼言本府係車
駕駐驛去處事務繁劇雖有添差通判史愿一員緣係
從軍今來不敢陳乞嗣添官吏乞於鄰近州府添差通
判內更那撥一員前來本府添差官庶幾可以分幹事
務詔添差常州通判孫邦就移添差通判平江府仍通
理前任月日任滿更不差人 十八日知成都府席益
言州郡置倅所以佐郡守之治入則貳政出則按縣方
今軍興之際尤不可闕憂路所管州郡軍監共一十三

處軍監之小國無所用置倖除夔州係帥臣及恭浩大
郡外施鈐達州南平軍係武臣知州皆合置通判又見
今通判職事專管催促未運前件州府係弘流所有通
判合行存留從之 七年三月六日詔隨州通判魯平
之特令再任以平之協贊郡事諳曉民情兼管幹營田
備見宣力故也 二十一日詔今後除授通判不得差
初改官人 八年九月十四日三省言福建六州二軍
內六州及興化軍皆有通判獨邵武一軍倖貳事付之
幕職官職任不再乞依做諸州軍置通判一員所本軍
見任簽判乞令成資罷令後更不差人從之 十五日
詔濠州復置通判一員先是知濠州楊桂言本州通判

昨緣朝旨減罷今來本州係極邊衝要去處全藉通判
協力故也 九年六月十日詔將新復州軍同知州並

合改作通判稱呼從同知順州陳楚請也 十一年八

月十八日詔臨安府通判劉將呂斌各特與轉一官以

守臣俞侯言各有才力究心職事欲望恩賞以為官吏

之勸故有是命 十二年正月十九日詔外豐軍討置

通判一員今後堂閤使閤差人 八月八日准西安撫

轉運司言欲令廬州存留正任通判一員外其添差通

判乞行省併從之 二十年三月二十日詔循州置通

判一員從本路提刑司請也 二十六年四月三日詔

應自今知州通判互論不法事件須拘留在任選委監

司之清正有風力者依公究治取見諸實曲直情狀具奏施行以左正言凌哲言比來守倖間有互相詆訐者臣僚論列乃欲先次並罷故也 二十七年六月十四日詔州郡令通判季點之外不得輒遣官下縣剋刷肆行刻剥若二稅之出違省限總經制錢之欠於季終月椿券食錢之欠不依月分則許州郡按劾以聞 七月五日詔諸路州郡無通判處遇守臣有闕其以次官如保選人即具申本路監司選差鄰郡通判或見任京朝官時暫權攝 二十八年十一月十六日詔瀘州夔州添置通判一員峽州通判一員並減罷 二十九年正月二十五日詔襄陽府利州通判各減罷一員以臣僚

言倅員為是故也 三十年五月十七日中書門下有

言平江府係人使經由路分事務繁重見今通判止係

一員難以應辦詔平江府更差通判一員繼而殿中侍

御史汪徹言人使經由自盱眙至臨安府何獨平江為

繁若六郡援例何辭拒之乞賜寢罷從之 孝宗乾道

元年二月十四日詔買馬州軍通判令茶馬司依舊法

奏辟從四川都大提舉 彌作乞依祖宗舊法之請也

四年七月二十日詔筠州復置通判先是京西南路

安撫運司言本州通判昨緣省併却置簽判一員今本

州係極邊控扼重地乞行復置故有是命 八月十四

日詔均州通判堂除差從吏部請也 六年六月二十

六日詔德慶府通判教授並堂除以本府舊係康州太
上皇帝登寶位陞為慶^德軍額故有是命 七年二月十
九日詔隆州依舊置通判一員 隆州舊係陵州管仁
壽井研貴平籍四縣元差通判一員自熙寧年改為監
日將井研貴平籍縣廢為鎮將通判改差選人判官今
復還州額改名隆州未復還兩縣間將判官改差京官
簽判今井研貴平籍鎮復還縣額本州仍有四縣今依
舊差通判改簽判為職官從吏部勘當也 九月二十
一日詔隆州通判堂除差人職官依條格定差從吏部
請也

宋會要 通判

淳熙元年十一月七日詔寧國府通判以二員為額改差明州通判毛玠
行簡填闕各通理前任月日已差下人依舊承替中書門下省言本郡
通判舊有正任添差各一員今立新額故降是命二年六月九日浙西提
刑徐本中言諸路州軍應差鄰州通判審問公事而正任通判實有事故
者許差以次官權通判前去仍不得以監當曹官主簿充代從之十一月
二十三日詔應赴半年前奏事別與差遣人通判以下資序並添差通判
其初授訖胡辭人亦依資格與正闕通判差遣三年正月三十日前任武
岡軍簽判陳公琦言本軍昨因臣僚申請裁罷通判其職事並隸簽判合
得酬賞乞賜施行詔依元置通判推賞指揮其任滿撫過蠻徭各安生業
別無侵擾引惹生事與減二年磨勘六年四月九日詔自今宗室戚里歸
正官等應合用恩例添差通判每州共不得過一員已差下人聽依舊簽
判以下及諸司參議官等準此七年十二月二十八日工部侍郎兼臨安
府王佐言本府通判賞差五員今闕其三職事不辦乞選才術疏通者添
差一二員詔許添差一員九年十一月十二日詔自今通州不得以季點
為名輒行下縣或因諸事差出令量帶入從嚴加禁嚴無得因緣騷擾仍

令監司常切覺察其或知而不問亦坐失察之罪從侍御史張大經請也
十二月三日右諫議大夫黃洽言添差經營釐務為今日之弊停則尤繫
利害乞自今應不釐務者並不許薦舉作釐務從之先是三年十二月曾
詔常州添差通判趙先夫特令釐務十年七月二十八日詔辰沅靖州通
判止許往來三州內幹當不許差出遠處從湖北提刑吳煥請也十四年
八月十六日利州路提刑張續言乞將本路通判窠闕除藩通判合自吏
部差注闕外四州通判自制置司奏辟外所有金洋興利文龍等州通判
窠闕依八路法送本路轉運司擬差庶幾不致闕官廢事詔除已差外
外今後依元豐舊法令本路轉運司照應條格施行十五年十二月二日
詔今後臨安府添差通判止差一員紹熙元年七月二十四日吏部言安
豐軍乞復置通判一員其簽判却行減罷詔依其闕令堂除二年二月七
日詔今後補授京官人厯三任闕陞知縣者如才力不能作縣雖是堂除
未可便與通判且今更厯一任如簽判屬官之類任滿方得陳乞小郡通
判差遣紹熙五年十一月七日滁州奏兩淮極邊州軍並無添差通判買
關獨本州因朝奉大夫朱輅用戚里恩例指射陳乞因而差注不釐務任
滿更不差人任滿之後又乞再任自後作員闕因仍差注已更四政緣本

州係極邊僻遠窮陋之處賦入微薄與真和州事體不同乞照應昨來創
行添差任滿更不差人指揮消落上件負關詔從之今後江北州軍並免
差慶元五年四月二十七日詔今後差注通判並不許指授有產業去處
以臣僚言臨安府仁和縣自慶元三年正月內推排物力造簿已定有韓
尚書戶所敷和買連歲送納多是不足蓋其家韓杖者見任本府通判輕
視屬縣敢為拖延縣廨中杖杖大怒輒追縣吏及里正因繫決罰備劇慘
毒杖放罰故有是命嘉泰三年五月二十三日詔今後知縣任滿人曾歷
總領所安撫制置經略轉運提刑茶馬鑄錢司幹官任滿與理為通判一
任開禧二年八月八日中書門下省言已降指揮將諸司幹官理為通判
一任以重其選可就吏部量取二十闕與你堂除進擬照得試中教官人
未曾該載詔將試中教官有資考人許令比附前名人陳乞十二月二十
五日詔崇慶府童川府遂寧府通判今後令臺除使闕嘉定六年三月二
十八日詔惠州添置通判一員所有簽置通判省罷其見任人聽令終滿
已差下次令赴部別行注授合入差遣以廣東諸司奏請故有是命詳見
某職官門十二年六月十九日臣僚言班行不清因由庸才之充塞亦以
更迭之制不嚴展轉凝滯乞明詔大臣中更迭之制凡未經作邑之人非

三丞二著權郎且與通判差遣庶令習熟民事轉而為州不致臨政乖疎輕重無措抑亦為官擇人可均內外之任從之十三年六月十五日詔奉議郎知贛州贛縣桂如淵特差簽判崇信軍節度判官廳公事二年滿日罷任滿理為通判月日將來更不作關十四年七月十日權兵部侍郎陳廣壽言國初懲五代藩鎮之弊始置諸州通判詔公事並須通判簽議連書方許行下蓋以武臣為之必賴倅貳協贊庶不致闕失今邊方郡守往往欲事權出於一已慮其相侵率不謀于同列自為剖判曲直失當不合事情而郡佐復多嫌疑柔怯避知事平分之樂而不能為闕決之助邊方做擾之餘困於科調而乃使不更民事之人專擅其上未免有以狼牧羊之患乞行下凡沿邊郡守倅武臣去處應干獄訟財賦須管倅貳同心併力公共事行苟能寅恭協濟課最上聞則守倅均賞其或貪虐肆行冤枉無告則守倅同罰庶仰合祖宗用人之意而使邊氓拜撫摩之惠戶刑部看詳照得州郡刑獄詞訟雖專決於郡守其間盡藉通判公心協濟乞依今來奏請從之十五年八月二十五日臣僚言伏見近者諫臣欲於二廣諸郡置倅陛下即俞其請是亦所以惠海隅之民也臣竊照廣郡多是武臣為守若設倅貳為益非淺儻曰郡之小者難於供給如英德府質

州等郡舊嘗有倅者何嫌於復置况是課臣請廢本州簽判並更有倅一
二冗職之俸以予倅則誠為可行若得添置數郡倅如遇關守之郡亦可
差權處知府邱又虛已致官人不願就僻地倅仍許經略司專行選辟從
之十六年五月九日都省言照得已降指揮紹興府脩奉撥官專委兩通
判每月一次躬親點視葺治竊緣通判各有本職恐事任不再合行添差
通判一員專以處職事官更不分管兩廳職事止通行簽押本府文書專
一主官撥官脩奉其請給人從合依舊來添差通判體例支破仍舊用路
鈐廳作廨宇庶幾辦事舉不為具文詔紹興府特置添差通判一員仍發
務專一主管昭慈永祐永思永阜永崇度攢官脩奉

宋會要



司理院

端拱元年十二月詔諸州州司理院并屬縣賦簿並用州印長吏曰省屬
縣自申州仁宗天聖五年十二月開封府言先準編敕應司理院禁勒公
事合銷紙筆油燈罪人合破薦席柴炭委長吏量公事刑獄大小以奉處
估賣贓罰衣物等價錢支買供用如不足於係省頭子錢內支給左右軍
延院每日贓罰錢內各支三貫文收買燈油紙筆供用不足欲於係省頭
子錢內逐院每日各支十貫文從之神宗元豐元年四月十一日并州言
本州僻小管宜川一縣每有公事止於司理院當直司勸勒乞併州院入
司理院從之乾道七年二月四日臣僚言臨安府所管左右司理院府院
三獄除每院推級四名推行重祿外其餘杖直獄子等自舊皆無請給往
往循習乞覓無所顧籍乞令三獄每處止許置杖直獄子一十二名比附
大理寺則例每月支錢十貫米六斛並推行重祿仍不許諸處官司差擬
如敢仍前乞取並計贓斷黑從之